



C 40-4514

3 64853

絕餘編序

生平行履百無一長獨有大菩提心忘身爲法捨己從人則堪質諸三世慈尊者也。自庚午至甲戌五年之中幾經困衡曾無退悔。蓋因乙亥仲秋復遇一友背盟而此志遂不啻如槁木死灰矣。丙子春本凝遁迹萬山深處甘與野獸同死。途中大病逗留九華。哀禱地藏本師仍得閑藏著述之決乃不復與文字般若爲讐。嗟乎。文字性空性空即是實相。實相離一切相卽一切法。豈離文字而解脫哉。追思昔年焚棄筆

60 1 2 3 4 5 6 7 8 9

10

80

1

2

3

4

5

6

7

8

9

硯絕而不絕。今也不絕而絕矣。非絕非不絕而論於絕絕無絕相。姑名絕餘。知我者其惟此編乎。笑我者其惟此編乎。吾以俟諸後世子與可也。

崇禎壬午仲夏藕益道人智旭書於吳興之鐵佛觀堂

畫金石錄志稿不啻歌詠本張兄失因于春本遺
之中故錄圖書有無足取蓋因丁亥吟詩題
畫人頭甚費筆三世慈華法身日與平生甲辰正月
壬午守愚百無一異識本大善別心法長流去每

讀繪錄草

絕餘編目錄

序

卷一

願文

六首

卷二

法語

十首

傳一首

卷三

序

三首

題跋

五首

書東

十一首

雜文

二首

疏

六首

卷四

讚

十一首

卷一

銘

二十三首

詩偈

一百四十九首

附對聯

四首

絕餘編卷一

萬益道人智旭著

門人圓果錄

願文

九華地藏塔前香文

丙子三月初九日

稽首慈悲大願王。本源心地如來藏。善安慰說真救世。現聲聞相護法者。願乘本誓度衆生。鑒我微忱垂加護。我今然臂表精誠。胡跪翹勤哀仰白。弟子智旭夙造深殃。丁茲末世。上無師長以提攜。下無同行相警策。雖受戒品。輕犯多端。雖習禪思。粗惑不斷。迺至

讀誦大乘。僅開義解。稱念名號。未入三摩。外則覩魔。黨之縱橫。痛心疾首。內則見煩惱之紛動。愧地慚天。復由惡業備受病苦。半身酸楚。已經十載有餘。三瘡綿縷。又及半年之外。痛娶婆之弊惡歎沉溺之無端。由是扶病入山。求哀大士。付身命於浮雲。矢菩提於永劫。敬然臂香六炷。一者供養忉利勝會。化身無數。地藏菩薩摩訶薩。二者供養大集勝會。現聲聞相。地藏菩薩摩訶薩。三者供養六根聚會。善巧說法。地藏菩薩摩訶薩。四者悔我三業重罪。所謂從生以來。

一切殺業。一切姪機。一切謗三寶罪。一切口過。一切意地種種惡念。乃至舊歲染疾之後種種飲噉。不盡如法。借諸戲劇以自排遣。如是等罪願盡消除。五者爲求四願。願諸律儀。恒得清淨。願速斷惑證真實道。願壽命長。康強無病。願充助緣。廣作福事。六者爲決疑網。若先禮懺求淨律儀。若先觀心斷除煩惑。若先閼藏。以開慧解。若先立行以廣福緣。惟願救世真士。大智開士。一切知見者。於諸衆生得不忘念者。必垂哀鑒。開我迷雲。我復於大慈悲父前灑血銘心。作如是

願如一衆生未成佛終不先自取泥洹。倘夙業因緣牽入惡道。願菩薩弘慈常覺悟我。使我念念恒自憶菩提心。令菩提心相續不斷。若夙障稍輕願大士威神加被。令我早成念佛三昧。決生阿彌陀佛世界。乘本願力及神通力廣於無邊刹海化度有情。盡未來際。無有疲厭。惟願大慈大悲哀憐攝受。

十周願文 六月初一日

稽首釋迦大聖尊。十方克盡人倫者。真實至孝真實忠。真實禮誼真師友。所說究竟真實法。真實如法修

行僧。我今哀請垂護持。願賜慈悲同作證。弟子智旭。生逢末世。福慧並微。蒙二親獨養。深恩罔知攸答。始則違親教命。造謗佛謗法重愆。既而稍解真乘。棄生事死。葬大節。本謂劫期取果。頓棄家緣。何意夙障偏多。久滯凡地。追初志而涕泗慚惶。念未來而痛心酸鼻。世出世法。兩皆失措。生報後報。娶苦無疑。由是以忍懼心。以殷重心。於壬申歲作乞恩啓。徧求師友。同學菩薩比丘沙彌居士。各發慈心。各持經咒。不惟先人蒙濟。亦令不孝減辜。是時卽自發心持滅定業真。

言二千萬。金光明空品三千卷。梵網上卷一千遍。互爲勝緣。擬於癸酉諱日。卽皆廻向。又何意障緣多擾。直至今歲入山方。完梵網經數。而病體沉重。勉強誦持。威儀不整。散亂多端。撫臆論心。益增愧怖。今值慈母棄世之辰。加念阿彌陀佛洪名。萬聲敬然。臂香三炷。滙諸善友所持經咒。若完未足。若足未足。總申廻向。比丘受籌持華嚴經一部。淨名經四十八部。梵網經百部。十六觀經四十八部。大悲咒一千。無量壽真言四十八萬。佛名四十八萬。果海持梵網經。菩薩戒。

本經四分戒本各三百部。大悲咒一千。往生咒一萬。減定業真言十萬。阿彌陀佛觀音地藏洪名各五萬。智淳持華嚴經一部。大悲咒往生咒各三千。佛名一萬。大獻持彌陀經百卷。佛名十萬。惟忻持無量壽真言一萬。法慧持大悲咒一藏。普福持法華經一部。佛名二十萬。智西持法華經十部。智地持一字大輪真言七日。梵網經十部。涅槃經一部。法戒持大悲咒一藏。成泰持大悲咒一萬。妙真持大悲咒十萬。大和持佛名十萬。性筏起信論一卷。性妙持往生咒三千。

法清持準提咒十千。大香持法華經二部。心見持法華經五部。大悲咒空品各一千。智洵持梵網經百部。智亮持梵網經二十部。往生咒一千。大建持梵網經五十部。菩薩戒本四分戒本各百卷。智成持佛名百萬。沙彌圓果。背梵網經一部。持楞嚴咒三百。行願品百卷。彌陀經三百。佛名十萬。減定業真言百萬。常樂持法華經十部。佛名三百萬淨依跪持行願品三百卷。海量持心莫作放逸偈百萬。禮拜阿彌陀佛三萬靈詰持減定業真言十萬。寂輝持大悲咒百徧彌陀。

經往生咒各百徧。海明持減定業真言十萬。寂浩持減定業真言十二萬。靈琦持準提咒十萬。明機持往生咒一萬。成泉持大悲咒一萬。成志念佛百萬。智明念佛百萬。優婆塞程智用持金剛經二百。菩薩戒本經一百。潘智海持金剛經一百。藥師經一千。佛名一萬。潘智建持七佛減罪真言二萬。以此種種殊勝功德同共薦拔亡父鍾之鳳。亡母金大蓮。伏願決生淨土。速證無生。蒙授記於十方。度舍靈於五濁。智旭又然臂香三炷。轉爲比丘沙彌居士。乞恩三寶。伏願受

60 1 2 3 4 5 6 7 8 9

10

80

1

2

3

4

5

6

7

8

9

籌比丘痛念正法之衰盡。革疑癖之病。捨其偏執。重修舊盟。果海比丘。福慧齊增。證真實法。智淳大獻。及大建智成等。各各志念堅固。戒品昭明。定慧圓修。自他俱利。圓果沙彌開發深智。成就深忍。壽命延長。身心永固。淨依沙彌念真實法。生無上慧。成忍辱力。開福德門。常樂海量。及成志智明等。各各道念彌堅。戒德昌懋。福壽綿延。慧性開朗。優婆塞程智用離諸障緣。成就二利。以宰官身。悟解脫道。智海智建。了悟塵緣。增長信力。捨惡住善。堅固菩提。又願智旭從今以

去。疾病消除。永無魔障。得大壽命。得大助緣。得大辭本。得大智慧。得大聞持。得大禪定。斷通別惑於剎那。利冤親衆於沙界。所有誓願。無不圓成。所有著述。允可佛意。所有佛事。速辦無難。所有開化。悉皆領悟。典釋迦正法於支那。作彌陀輔弼於樂土。紹地藏之家業。傳觀音之心印。等文殊之智海。入普賢之行門。以勢至念佛三昧。自度度他。以迦葉結集深心。護法護衆。俾邪魔外道。遁影藏踪。使教戒禪那。日昭月朗。恭惟三寶垂慈滿菩提願。

60 1 2 3 4 5 6 7 8 9

10

80

1

2

3

4

5

6

7

8

9

持咒香文 六月十四日

稽首地藏王大悲觀自在。總持妙章句及一切三寶。救度諸苦厄。能滿諸希願。哀愍衆生者。惟垂慈護持。弟子智旭夙生業重現。世罪深。世出世法多諸魔障。豈但不能剋期取果。普報四恩。亦且不能專修聖道。弘範三界。悠悠歲月。放恣因循。致使他緣逼迫。惡疾纏身。復以虛名所眩累彼若繙若素善友知識。種種供養。種種護持。反躬內忖。何德堪消。靜言思之。實增慚懼。爰於六月初八日爲始。迄十四日爲終。屏息他

緣。結壇一七。專誦總持章句。奉報外護深恩。敬然臂
香供養三寶。一者伏願比丘果海戒根堅固。定慧圓
明。正見卓然能轉時流。不被時流所轉。決成大器。作
法。廈之棟梁。二者伏願沙彌圓果淨依。增長壽命。增
長色力。增長福德。增長智慧。大智大願。大忍大識。內
外一如始終一致。三者伏願承天寺照山房振宗持
行。靈秀廓照徹塵體。寂用徵周洽。隆恩開性等。各各
於世法中。無諸障難。於出世法。增長信根。不離塵勞。
了見佛性。四者伏願菩薩戒優婆塞。程智用。障緣消

滅身心永安。於佛法中深入經藏而智慧如海。於儒業中。早登科甲而大作金湯。五者伏願正知韓逢祐解脫客塵清淨緣障。了知恩愛猶如桎梏自然伏斷煩惱罪根。身心快樂福壽並隆。六者伏願錢士貴程通慧大心不退。正見日昭。自利則悟法一源。利他則徧行四攝。滿求子之凡心。成弘護之聖行。七者伏願沙門清沼永聞智瑋達淵明教行方祖心智。沟常樂智音。智亮智明。智成志性泓圓。六圓淨慧先悟德定。明常信海朗恒觀。了凡及此地法雲菴興邦悟省。

等。各各福壽增崇。慧命堅固。遠離災障。成就道果。善根已熟者。今必脫善根已種者。今必熟。八者伏願優婆塞程智我馬成之姚年張贊育劉海晏萬應鵬陳淨傳王思湖沈三郎李載白及信女潘門鍾氏李門鍾氏王門潘氏李氏大姐李氏二姐等。於世法中如意快樂。於出世法志念深求。未種善根者。今當種已種善根者。今增長欲行惡法。皆悉不成。所修善業。皆得成就。關閉一切諸惡趣門。開闢人天涅槃正路。九者伏願智旭從今以去。痛苦消除。身心康泰。福德增

60 1 2 3 4 5 6 7 8 9 10 1 2 3 4 5 6 7 8 9 10

80

1 2 3 4 5 6 7 8 9

長壽命延長。速完檢藏之願。早遂斷惑之心。著述開人天眼目。字字懸契佛心。營業作末世福田。事事暢快本念。又願與諸縉紳素知識。常作菩提眷屬。同生極樂勝邦。俱蒙授記。共化十方。生生世世爲影響衆。在處處爲善知識。直至道場。永無隔礙。十者智旭。又爲決疑拈鬮。更然一炬。供養三寶。願以現知現見。真實證明。令我所拈之鬮。決定靈感。從此之後。一意行持。永無疑惑。自利利他。功無虛棄。滿菩提願。廣度衆生。恭推法界三寶地藏慈尊。大悲觀世音菩薩同賜。

慈悲哀憐攝受

閱藏願文 六月十九日

歸命法界大醫王。種種應病妙法藥。觀音地藏看病母。願賜慈悲同哀護。弟子智旭與法界衆生。背常樂我淨之真性。起無明煩惱之幻疾。三惑爲衆罪根元。四大爲百病窟宅。保妄念而塵劫。不肯捨離受毒身。而輪迴無有窮絕。乃至幸獲人倫。仍嬰衆苦。叨成僧相。尚纏惑根。被業浪之所漂沉。遠正法而丁未。遭禪那教觀徒。有虛名戒律總持。咸無實義。致使魔軍得

60 1 2 3 4 5 6 7 8 9 70 1 2 3 4 5 6 7 8 9 80 1 2 3 4 5 6 7 8 9 80 1 2 3 4 5 6 7 8 9

便障難頻侵。身則衆病交煎。心則他緣逼迫。欲行善事。每不能成。是以深生慚愧。諦信因緣。歸命觀音地藏。二大慈尊。求哀憲悔。懇賜護持。曾於三月十九日爲始立願。誦持廣大圓滿無礙大悲心大陀羅尼。神妙章句二百七十堂。以療惡瘧。今神咒告完。惡瘧漸愈。益驗妙法恩力不可思議。敬然臂香三炷。供養觀世音菩薩及十方三寶。願我從今以去。普與法界衆生決定皆得永離病因。永絕病緣。永斷病苦。永無病報。身心安樂。真性現前。發起大心。行諸妙行。同生淨

上同證菩提。復然臂香三炷。卽於今日爲始。暫減恒課。續閱藏經。惟願法界三寶。二大慈尊。護法天龍。一切聖衆。慈悲覆護。哀愍智旭。令智旭此番閱藏。決無障緣。從始至終。字字明解。外緣則事事豐饒。行人和順。毫無片事擾心。內行則精義入神。隨文妙證。決得聞持勝力。普與法界衆生開頓悟門。成正修路。摧魔外之邪幢。奪權小之僻執。浴法日以重昭。補義天而廣覆。俾末運還爲正運。文字咸歸性靈。法藥所需。沉疴立起。法雨所潤。枯槁旋生。恭惟三寶及二大士。垂

哀證明滿菩提願

完梵網香文丁丑三月初七日

歸命華臺盧舍那。千華上佛千百億梵網契經心地
品。玄通華光大智明。亦禮彌陀大願王觀音勢至大
海衆。及我地藏勝慈尊同賜哀憐垂拔濟。菩薩戒沙
爾智旭。自惟業障深重不遇聖時。少則隨邪師教誘
毀三寶。長乃正信捨家知識已逝。徒懷覲期證果之
思。誰下鉗錘辣手空抱擢邪顯正之志。誰知孤孽苦
衷。僅有道友惺谷壽公。猶能互相砥礪堪嗟集履復

先歸。更有同盟歸一籌。公差足互相酬唱。深痛三人
成市虎。是以自他二利進退無成。身心二病內外交
發。策杖杖而入深山。埋姓名而藏醜陋。復以佛慈密
佑。法性冥熏。一息未亡。四弘猶在。而舊友如是。助公
遠來相訪。兼因薦拔之舉。遂作講演之緣。竊念梵網
尊經。久秘龍藏。下卷雖有義疏。而古畧多含人罕妙
解。上卷則兩家草創。皆隔門牆。致使修證要途。千秋
貿貿。旭以夙因微善。得遇靈文。再四潛心。宛如故實。
不辭鄙拙。合註斯成。敬然臂香二十一炷。回向真乘。

60 1 2 3 4 5 6 7 8 9

10

80

1

2

3

4

5

6

7

8

9

一者奉供三身一體盧舍那佛。二者奉供梵網心地
教行經。三者奉供玄通華光王菩薩。華光王大智
明菩薩及文殊普賢藥王藥上金剛藏。虛空藏。彌勒
金剛手等一切菩薩盡梵網海中發趣長養金剛十
地菩薩摩訶薩。伏願智旭無始至今身不善業口不
善業意不善業謗毀僻謬種種罪惡皆得消除。一切
善根皆得堅固。四者奉供極樂世界阿彌陀佛。依正
宣揚微妙法藏。觀音勢至清淨海衆。伏願智旭捨此
幻身定生極樂華開見佛滿大願輪。五者奉供地藏

菩薩摩訶薩。伏願智旭大智開明大悲增上離諸煩
惱廣度衆生滅諸罪障。廣代羣苦。六者痛念孝豐所
請藏經未獲供養。代爲菩薩比丘心見供養三寶。願
心見比丘福慧增隆成茲勝事。七者奉爲先考鍾之
鳳先妣金氏大蓮暨一切亡過六親眷屬等供養三
寶。願仗良因同離八難超昇淨土究竟菩提。八者奉
爲泉州府開元寺一軒新示寂。肖滿全公湛一輝公
開林演公供養三寶。願仗良因同生淨土悟無生忍
廣度羣迷。九者奉爲荊度恩師雪嶺峻公。十戒闍梨

戒宗孝公及道友惺谷壽公。璧如鎬公。自天浩公不忘音公。月心愍公等。供養三寶。願仗良因。滅除罪垢。永離惡道。得宅九蓮。十者奉爲邪師袁一枉及正師吳一標。供養三寶。願邪師永捨邪見。不受邪報。正師增長正信。成就正修。十一者奉爲道友。如是助比丘供養三寶。願令身心安樂福慧兼隆。成千古之真品。作末世之藥樹。十二者奉爲道友。心見比丘性士比丘。大建比丘泉海比丘。供養三寶。願令色力堅固。道念增崇。荷擔正法。作大棟梁。十三者奉爲菩薩。戒沙彌圓果弘孝。法同沙彌海晏。形同沙彌覺。非定猷通恒淨塵等。供養三寶。願令各增福德。各長智慧。各發大心。各修大利。破除習氣。成就剛骨。荷負法門。永超權小。十四者奉爲山中一切隨喜結緣之衆。若老若少。若僧若俗。供養三寶。願令深植善根。永爲道種。脫離塵網。趣向菩提。十五者奉爲菩薩。戒優婆塞。程智用。供養三寶。願令世出世法。皆離魔障。早獲麟兒。速登科甲。轉父母親族之邪心。成銅殿刻經之大願。大作護法。重興道化。十六者奉爲菩薩。戒優婆塞。徐弘

鎧供養三寶。願令早離王難。增長正修。得出世之淨福。開微細之實智。十七者奉爲護法居士。正知韓逢祐道。昕陳丹衷大潮萬應鵬。通慧程文濟及錢士貴。項淨理項淨香等供養三寶。願令道芽堅固。曾種深培。福壽彌增。正信開發。三學資神。四弘被物。十八者奉爲虛空法界一切曾受菩薩戒者供養三寶。願令戒品堅牢。細過無犯。定共道共以同彰。攝善攝生而圓證。由三十心登體性地。速成正覺。滿足法身。十九者奉爲虛空法界一切受菩薩戒有毀犯者供養三

寶。願令罪障消除。戒品復淨。或重或輕或故或誤。一切羈絆永無累垢。二十者奉爲法界之中一切舍識。雖未受戒。曾聞梵網名者供養三寶。願仗良因。同生覺悟。發心秉受如法修持。二十一者奉爲法界之中一切舍識。雖具梵網真常佛性。從不聞此名者供養三寶。願以大慈悲力。不思議力。同體法性。真實威力。令其從今以去。咸得聞此微妙法門。生於正信。發於正解。離三塗。超八難。決登戒品。並事真修。展轉誘化。同證菩提。若諸衆生具有無始惡障所纏。不能自拔。

昏迷倒惑不能覺悟者。願以三寶究竟大功德力。大智慧力大慈悲力。阿彌陀佛無邊願力。地藏菩薩勇猛誓力。令諸衆生速能覺悟早拔苦輪。設其定業決應受報。願令智旭早生淨土。一見彌陀。隨乘願輪。普於十方不可說不可說世界海中。徧受阿鼻地獄劇苦。乃至一切重輕地獄諸苦。我皆代受。令彼衆生先證菩提。假使盡法界中。乃至惟一衆生未成正覺。智旭甘於無量地獄備受楚毒。無厭悔心。盡一切劫亦無疲倦。智旭今日所有誓願。悉同過現未來。一切諸

佛諸大菩薩所發誓願。悉是一切諸佛諸大菩薩之所加被。若智旭具有無始惡業。應墮無邊大苦趣中。神識昏迷。不復自覺。違今日大菩提心。大菩提願。大菩提行者。仰願舍那慈父。釋迦本師。彌陀願王。地藏悲母。哀我護我。覺悟於我。令我於苦趣中。憶今本願。不捨於苦而度衆生。又願以今然香發願功德因緣。令釋迦正法重昭於震旦國中。魔外邪風絕扇於恒沙世界。持律者洞明持犯。善識開遮。習教者深知義理。了達性修。坐禪者擴悟心源。不遭魔外。念佛者事

經卷編

卷一

十五

理圓融。自他不隔。又願一切法門人皆通達。永無鬪
諍堅固之愆。盡華門庭施設之見。念念紹佛祖心燈。
法法匯梵網性海。情與無情同圓種智。

滅定業真言咒壇一百十日圓滿。然香饌願文
丁丑

稽首業性如虛空滿分解脫滅障者。我今持誦秘伽
陀願滅自他諸定業。無邊福慧互莊嚴成就希有勝
功德。見聞隨喜發菩提心地性藏同圓證大菩提。

婆伽婆佛陀妙覺者無上地

摩訶一和沙無相垢地

阿訶羅波離垢地

弗明行足法雲地

阿那訶善地

阿尼羅漢

變化生

不動地

阿羅漢過三有遠行地

阿那含前地

斯陀含

度障難

勝地

須陀洹觀明流

須陀迎明地

須阿伽

道流

離垢

鳩摩羅伽逆流歡喜地

達磨邊伽

波羅提

弗陀

波訶諦師羅叉伽

羅叉必

佛度阿

法必

唵必白伽羅曇沙

羅羅諦流沙

度叉一婆

度佛阿

度沙必

度生婆諦

度利

度和差

度只羅

度安爾

度仰阿

流山

迦必阿羅必叉伽

阿毘跋

毘跋致

安婆

續錄編

卷一

十六

沙流摩阿流羅伽流諦伽度流伽度信

念進定慧戒向護捨願一切菩薩摩訶薩惟願大乘三寶若聖若凡同加護念同作證明聽智旭今日至心懺悔滿智旭今日廣大願輪胡跪合掌灑臘剗忏作如是白我弟子智旭與法界衆生自迷真性枉入妄流隨逐無明增長惡業無始至今曾未覺悟所積罪障無量無邊賴聞地藏本願經發心出世更遇滅定業真言立志利他將爲銅殿之緣先課加持之行既勸同仁共持十萬萬徧兼復自勵專持五百萬聲

敬詹丁丑五月十七日爲始至九月初八夜爲終十日方便百日正修結如法之淨壇受一食之勝行仍於道場將畢默課行法助成一七熏修六時行道以此功德仰祈銅殿大緣速能成就占察壇法早獲流通誦持既畢恭然臂香三炷供養法界三寶耑求加被所願克圓又念種種定業皆由身口意三廣造十惡惡法既成如弦發箭勢須遠到理無中止雖大士悲心不可思議真言神力不可思議亦須新殃永斷方乃故愆俱亡而撫躬內省慚悚彌增我實姪機未

淨云何使人永淨姪機我實盜意未忘云何使人永盜意我實殺習未除云何使人永除殺習我實妄言綺語惡口兩舌種現未消云何使人永消口過我實貪瞋癡起現不停云何使人永停惑毒嗚呼檢點一身渾是短羞惶半世已成虛扼腕痛心號天慟地更然臂香三炷深自悔責亦爲法界衆生求哀悔過伏願從今以後十惡消除三業清淨不造未來之因不受過去之果又然臂香一炷供養五臺山妙峰老師及雲棲和尚慈山師祖紫柏大師密藏尊者一切

真善知識願以福慧力同加覆護令我所願速得滿足又爲九華山中舊住主人東西二寮若長若幼一切眷屬持滅定業真言二十萬然香一炷供養三寶願令各增福壽各長慧根以無我心善和鬪訟以忍辱法開導後昆永無自他彼此之私痛絕勝負是非之見人人爲地藏功臣念念惜法門羽翼又爲現在成就藏櫬自照性士大朋等及一切助緣善友別持真言十萬又爲將來成就普同塔事自照興邦悟省及一切助緣善友亦持真言十萬總然臂香一炷供

養三寶。願令各得增長壽命。增長信心。增長福德。增長慧。增長慈仁。增長安樂。增長勝事。增長道風。又爲九華山中來聽法者。一切與會隨喜。結緣聚友。別有真言十萬。然香一炷供養三寶。願令各發菩提大心。同修戒慧真道。永捨流俗。知見堅固。無上勝猷。又爲往來此山流寓此山。一切繙素。別持真言十萬。然香一炷供養三寶。願令各念大士深恩。各護法門大體。掩惡揚善。嘉智矜愚。力懲破法之心。猛作干城之助。又爲菩薩戒優婆塞程智用。日持大悲神咒七徧。

中舉爲期爲其父親惟明代持滅定業真言五十萬。爲其族弟智我優婆塞。日持大悲神咒七徧。進學爲期今更加持真言十萬。然香一炷供養三寶。願令智用早歌麟趾。深慰孝思。及與智我同冠進賢堪爲屏翰。不忘夙昔之盟。急酬銅殿之願。又爲菩薩戒沙彌圓果舊持真言百萬。今更加持五萬。然香一炷供養三寶。願令開發慈蒙。拓鍊弘毅。深培福壽之基。永離作輟之習。

立躬如泰山。喬嶽矢志必涵坤蓋乾。又爲法同沙彌常樂海晏。形同沙彌覺非。各持真言五萬。共然臂香。

一炷供養三寶願令從事入理得大總持成就五根
 發明五力三障圓消萬善克備又爲菩薩戒比丘果
 海日持真言三百十夏爲期共計百萬加持大悲神咒七徧成器
爲期兼爲大建成泰共持真言百萬今更加持十萬然
 香一炷供養三寶伏願大建比丘身命堅強智慧敏
 锐永捨攀尋枝葉之習了悟直捷根蒂之功析義如
 匣丁解牛得理如鵝王擇乳成泰比丘專求已過毋
 責人非了知將就苟且難出生死牢關深信駕駘頗
 瞰不可橫超淨土猛策新猷莫仍故轍果海比丘懷

思明辨沉細精微痛革浮氣粗心未會先會專求深
 造自得若無若虛悟明文字三昧似獨繭以抽絲善
 能人理深談必敲骨而取髓又爲法同沙彌淨依舊
 持真言百萬爲形同沙彌通恒今持真言十萬爲形
 同沙彌淨塵日持大悲神咒七徧成器爲期加持真言五
 萬共然臂香一炷供養三寶伏願淨依折伏貢高斷
 除我慢深培福壽專務思修省已之短慕人之長下
 學上達卽事鍊心通恒災障消除戒根永固福壽增
 長定慧圓明成大法器作大棟梁淨塵身康壽永福

長慧增。雄勇特達剛毅果敢。超群拔萃。破格剖篋。大法自任千古自期。又爲菩薩戒比丘心見道昉各持真言五萬。共然臂香一炷。供養三寶。伏願心見比丘福德增長。智慧開明。方便善權攝化。繙素莊嚴。大藏速得圓成。道昉比丘名心霧散。覺意日明。莫念鼻孔撩天。但顧脚跟著地。立行則徹。始徹終。惟向一門深入。求道則惟精惟一。不從多法浮貪。雜想應時消落。三學當體圓明。又爲大賢大真大捨大文受籌靈山清沼。永闊大懺道震。共持真言十萬。然香一炷。供養

三寶。伏願賢等福慧增崇。煩習永斷。荷擔正法自利。利他。又爲智仁智淳性觀定。成就志照乾海。量照德智。瑋明教共持真言十萬。然香一炷。供養三寶。願令緣障頓消。二嚴克備。勤修出要。永離妄因。又爲一切禪者。一切學者。持律者念佛者。瑜伽者。邪命者。雲遊者。務農者。綯是著如來衣。現僧伽相。踐伽藍地。冒出家名。盡三天下所有縉流。共持真言三十萬徧。然香三炷。供養三寶。伏願狂誕狐禪。盡轉而爲宗說。俱通之龍象。鑽紙蠅學。盡轉而爲隨文入觀之獅狛。羆羊

60 1 2 3 4 5 6 7 8 9

70 1 2 3 4 5 6 7 8 9

80 1 2 3 4 5 6 7 8 9

戒子。盡轉而爲定共道共之律麟。狠狽蓮宗。盡轉而爲猛智慧行之角虎客作瑜伽。盡轉而爲神通變化之高流。禿頭商賈。盡轉而爲六度萬行之導主。雲遊賊住。盡轉而爲頭陀勝行之芳標。農事僧民。盡轉而裁法界園田之靈種。又爲菩薩戒優婆塞徐弘鎧日持大悲神咒七徧。爲期難加持真言五萬。然香一炷供養三寶。願令釋結解怨阜離障難。悔過遷善增長信心。不負夙根。成就法器。又爲菩薩戒優婆塞陳道昕舊持真言十萬。爲優婆塞項淨理舊持真言十萬。爲

韓正知錢士貴胡汝淳程通慧項淨香等。今持真言十萬。共然臂香一炷。供養三寶。願令各增正信。各長威力。世出世法所願從心。永作金湯進趨覺路。又然臂香一炷。供養地藏慈尊。將此持咒然香功德。并及向日爲亡父鍾之鳳。曾持千萬爲亡母金大蓮。亦持千萬爲法界有情。又持千萬爲一切師友同學弟子檀護。怨親知識等。所持若九十萬。若三百二十萬。若四十八萬等。乃至若爲延生。若爲薦亡。若爲悔過。若爲除災。若自爲。若爲他。所持真言。若多若少。若至心。

60 1 2 3 4 5 6 7 8 9

10

80

1

2

3

4

5

6

7

8

9

若散心皆悉攝取現前普同廻向。又復普化大心緇
素共持十萬萬徧若化未化。若完未完過現未來一
切功德亦皆攝取現前普同廻向。深心信解真言威
力不可思議。一一字中圓具法界無邊功德。一切字
中亦復如是以此重重無盡不可思議功德威神令
我一切得如所願滿菩提願。又然臂香四炷重復供
養法界三寶及地藏大士。末決所疑至誠占於第三
輪相。一者依占察法先悔罪障。二者住阿蘭若先修
禪定。三者著述弘經先修觀智。四者植諸善本行衆

三昧。懇乞大慈分明指示。令我此生不致浪死。又香
三炷供養淨土三寶。以此功德悉皆廻施法界衆生。
願共一切衆生捨此一期報身決定同生極樂世界。
永離苦因苦果速證菩提涅槃。

絕餘編卷一

亦曾醉卷一月此

未嘗苦悶若果惑此皆是里榮

醉矣一以乘坐余也一以肆食為家固主醉樂其事
三學舟養學生三宵復也以醉惑吾駭亦忘學事上
三和惠之大慈余則甚亦令奔北坐小延見張父才

絕餘編卷二

萬益道人智旭著

門人圓果錄

法語

示朗融

其真實文眼處矣

萬法本自融徹由迷情封執而成隔礙如一指能敵
山岳如認漚必遺大海不惟埋沒自己靈光亦且冤
屈六塵境界詎思六塵非能惑人人自妄受六塵所
惑根根幻馳識識紛動然仔細推求塵既不居其咎
根亦豈職其愆根既不職其愆識寧獨當其罪三科

分析既無真妄。縱令共合。那有實法。而衆生於此虛妄法中。著我著人。分取分捨。猶如捏目。亂華發生。更欲分別。花相孰妍。孰醜。孰大。孰小。不亦惑乎。惟將身心世界全體放下。作一超方特達之觀。譬如爲天下者不顧家。則智眼昭明。而一切障礙境界。不覺其融于性德。無往非真實受用處矣。

示三止

永嘉大師有云。惺惺寂寂是無記。寂寂惺惺是妄想。惺惺非。此四語。叢席爭傳誦之。然先須徹悟。

惺寂源頭。方不墮守精魂窠臼。卽如儒者亦云。明鏡止水以持心。豈可謂慎獨工夫。便是禪門中奢摩他妙修行路耶。四祖謂牛頭云。觀者何人。心是何物。只此二語。直得徧計妄想。百雜粉碎。以此體真。以此方便隨緣。以此息二邊分別。一句中有三玄。一玄中具三要。喚甚麼作獨。將誰去慎。不惟妄想無記。無處容身。恐惺寂二字。亦并無處著落。非惺非寂。是謂寂寂惺惺惺寂寂喚作不二。早已二也。況可云雙修並運哉。悟此成修。是名一心三止。待時而說。乃成法華。

三止。自利利他俱不離此一字法門。能於一滴水中興雲霆雨貴在神龍之自奮迅耳。示文約做工夫人。每每被昏散二障所擾。不得成就。久久便致退悔。殊不知昏散根源全由迷已作物。故楞嚴經云。認悟中迷。晦昧爲空。乃至昏擾擾相以爲心性。夫昏則障。慧擾則障定。定慧既障。則睡眠與散亂雜呈。若欲去其根源。先須識取心性本體。從來明靜。諸佛證之爲定慧。行人修之爲止觀。止觀之功。全卽明靜。

之體。惟靜故明。惟明故靜。旣非二致。豈有前後。但約對治法門。昏蓋重者以觀起之。散亂多者以止息之。息散之止。非無觀。起昏之觀。非無止。止觀不二。勤修不息。自然本體漸露。客塵漸銷。要知這著工夫。大段間斷不得。又大段性急不得。所以儒門貴勿助勿忘。佛門喻以彈琴。太緩太急皆所不取。然欲除昏蓋。直須打起精神。不可貪戀蒲團穩坐。而欲除散亂。正不必厭惡妄想。直須覲破妄想無性。則自然休去歇去。故僧問巖頭云。起滅不停時如何。巖曰。咄是誰起滅。

只此一語可爲明心見性者作第一先鋒也

示慧幢上座

予讀子輿氏書至舜盡事親之道而瞽瞍底豫。忽見圓頓觀心要旨焉。夫父雖至頑不可捨之而別覓他父。雖頑父卽我真父不可如傲象之順命爲惡。順命爲惡非事親之道也。捨父別覓又可稱孝乎。現前介爾一念亦復如是。全體卽是無明。又全體卽是法性。無明猶頑父也。法性猶真父也。順無明流造業流轉。猶如傲象捨妄覓真。別觀法性。猶如背父逃逝。雖善

惡途轍稍殊其爲不孝均矣。六道凡夫順無明而爲惡者也。藏通別三種行人。捨無明而逃避者也。若知焚廩掩井之瞽瞍。卽是允若底豫之瞽瞍。則必盡事親之道于己躬。而肯作順逆兩法以虧天性耶。所謂盡事親之道者。亦只是深信父實生我。除此父外。別無真父。然斷斷不可從命爲惡。直須竭怨慕之誠。以格之。則頑如瞽瞍亦可回心。况未必如瞽瞍者哉。觀得。然斷斷不可隨其生滅。不事觀察。直須以不思議

一心三觀深體達之。則縱令惡無記心尚成不思議境。况善心哉。知一念中圓具三德秘藏。事理兩重。三千五徧互融。深生信解。名之爲慕。此境若不現前。只是止觀力微。發勤精進。誓以十法成乘。名之爲怨。若能如此努力。縱鈍逾般陀。也須發明有日。倘悠悠忽。忽縱利逾藍弗。敏過達多。的無濟也。上座久種善根。信力牢固。但平日學問。不知除却求放心外。更無餘訣。所以千經萬論。不能同條共貫。今山中聚首。一載復欲相別。惟此一味單方相贈。能服此藥。實爲千

里同風。若謂此外別有則是自欺自誑。雖歷劫同住。終是未曾覲面矣。况色力有限。年光不多。奈何泛泛遠求。而不求其功于緊要地乎。至于借事助理。則大悲行法。以求壽命。爲開眼之地。梵網全經。以求圓解。爲起行之本。佛號千聲。匯歸淨土。爲歸趣之地。然事非徒事。全事卽理。因果圓彰。自他不二。貴向頭頭法法中徹見。法界源底。只是一法界。更無二法界。所謂一以貫之。儒教尚然。况圓頓佛法乎。思之擇之。

示未能

60 1 2 3 4 5 6 7 8 9

70 1 2 3 4 5 6 7 8 9

80 1 2 3 4 5 6 7 8 9

珠生濁水蓮出淤泥。從來聖賢豪傑固不擇地而生。但習俗移人。賢智不免。非有大識見大志氣大力量。大方便鮮克自濟。求其無待而興不受幻境所侵奪者。厥惟艱哉。夫所謂幻境侵奪者。不惟順流俗而與之俱化也。即使厭流俗而切思遠離。亦名被其侵奪。以一切境界全是無明變現。無明變現之性全卽法性。由不達故。橫生欣厭。欣成六道。厭墮三乘。去無上菩提遠矣。欲趨無上菩提者。固不得隨順幻境。亦不得厭離幻境。但了幻境卽法性。悲長夜之在迷。以悲得

迷故。起無作二誓。欲拔性德之苦。以了性故。起無作二誓。欲與性德之樂。如此慈悲誓願。方與地藏法脉相應。亦與十方三寶氣分交接。先須方便發此心已。則一切不如法境界。一切末世惡態惡習。觸目警心。無非助發菩提資糧。故起信論云。或有菩薩見法欲滅。爲護正法。故發菩提心。或有菩薩見衆生苦。而發菩提心。正謂此也。四諦之中。苦爲初門。娑婆世界修行一日。勝于淨土修行一劫。法不在泛涉。會心者妙。藥不論貴賤。起病者良。見思之病雖急。但是其標無

明之病雖緩。却是其本。急則治其標。緩則治其本。皮既不存毛將安附。坎坎伐木不如并大地而掀翻之。夫所謂掀翻大地者。祇是諦觀現前一念。非自非他。非共非離。三際叵得。十方無朕。廓然太空。森然不滅。無倚無依。思議不及。海印炳見。橫徧豎窮。如一念一切諸念。亦復如是。念性固然非關觀得。藉觀圓顯生佛同歸。觀而未顯。障由三惑。弘誓策發。止觀安心。破徧護通。調停道品。事理圓進。六即防非。安忍離愛。功成無惑。萬勿悠悠。視作等閒。擬心姑待他日。又萬勿

急急欲圖脫離。不知藉境鍊心。昔陽明學步。墜五斗米于兩足循堂而走。去米之後。其疾如飛。卽做工夫第一妙喻也。靈犀一點通尤須善此訣竅。

示慈昱

佛法大海信爲能入。智爲能度。信如堅舟。智如柁師。其餘五度及萬行。則皆舟中器具也。欲令信心增長。先須時時念生死苦。警悟無常。不得沉迷五欲。執著世情。以種種世情決定了我生死。不得種種五欲。決定牽人入放逸坑墮惡道苦。今雖處在煩惱之地也。

須隨緣稍自勉拔。豈可尋波逐浪直至沃焦而忘返耶。既能于生死長夜中發得一點真實信心。卽宜急求智慧以爲導師。求智之要。第一在親近明師良友。第二在讀誦方等大乘。非明師良友。決不能益我身心。非方等大乘。決無有出世正楷。若人有信心而無智慧。則能增長煩惱。若人有智慧而無信心。則能增長邪見。故知船及柁師。相須度險。缺一尚自不可。況復俱乏。則茫茫苦海。安有出期。古人云。一失人身萬劫難返。此身不向今生度。更向何生度此身。莫謂火

燒眉毛。且圖眼下殊不知人間五十年。不過四天王一晝夜耳。倘不信後世苦樂。只如卧時身本在牀夢中種種見聞不滅。豈可作斷滅見哉。高明之士。早自著眼可矣。

釋迦提闢主

法華一乘妙旨。惟令一切衆生開示悟入佛之知見。然佛之知見。非他節諸法實相是也。諸法實相。非他卽現前一念心性是也。現前介爾一念。不自生不他生。不共生不無因生。未生無潛處。欲生無來處。正生

無住處。生已無去處。心無心相。則其性無生。無生故無住。無異無滅。無生住異滅。卽真法性。橫徧豎窮。不可思議。若于此無相妙心。妄謂有心相可得。則佛知見便成衆生知見。若卽此妄相幻心。達其本非。有相則衆生知見便成佛之知見。而此一念心性。旣舉體全空。亦復卽假卽中。以三諦宛然。故三觀亦自法爾。以法爾之三觀。照宛然之三諦。能所不二。境智互融。于此妙法。能生信解。名爲隨喜。解義觀文。名爲讀誦。轉示他人。名爲講說。歷事煉心。名爲兼修正修。五品

功深。六根斯淨。似成真發。究竟可期。有相無相。二安樂行。一串穿却。祇貴篤信力行。別無奇巧方便。至於十妙五玄四悉三法。皆是一心圓具。說之則名相紛然。照之則海印炳現。如人飲水。冷暖自知。當非筆舌所能罄矣。

示乳生
夫置身于海中孤洲。而伯牙善琴。其情移也。望之似木雞。而餘雞無不走者。其神全也。世間小技。尚非聊爾。可以奏功。况欲學出世大道。佇肩如來正法者乎。

是故智者大師所明圓頓十乘觀法必先之以二十五前方便所謂且五緣訶五欲棄五蓋調五事修五法就此二十五事復各具表法及觀心法門夫然後正助合行事理雙備如足目並運安隱入清涼池後來禪士講徒各自率情任意逞一得之見罔達大方軌則以此齒莽覆裂學問未成一世間伎術憂憂乎難之而欲投足宗教兩途恩以自利利他誠奚望也是故真正學人必先移其夙情則神自全情之所牽雖萬別千差總不出色聲香味觸五種神之所虧雖

亦受病不等總不外貪瞋睡掉疑五種急須訶棄則聖賢可階梯而至矣易曰山下出泉蒙君子以果行育德又曰蒙以養正聖功也深思果行育德二語方識養蒙之法文殊師利勇猛智普賢慧行亦復然以此出世法乳自養即可兼養法界衆生莫患世間無子期也

又示乳生

夫不易移者習情必有以忘之而始移不易全者元神必無以戕之而始全今以半耗之神日汨于久沿

之習。欲求超凡入聖制外降魔安可得乎。世之悠悠無志。甘與草木同朽者誠無足論。最惜徒有大志。弗能自拔。設思自拔。曾不時時自省。究竟與無志者同歸。哀莫大焉。試一自省。則晏安習氣華靡。習氣溫飽。習氣貢高。習氣疑惑。習氣詩文。習氣較長競短。辨是非。非習氣。乃至尋行數墨。依文解義。習氣凡所可胥擾我神明者。六時之內。何等紛紜雜沓。而依教觀心。澄思懶過。縱有萌蘖之生。蓋不啻一暴十寒矣。且人命呼吸。轉眼無常。貶得眼來。已成腐世。儒者云。才說

姑待明日。便不可也。况二年三年耶。九旬同住。信非偶緣。只恐奔秋未去。鴻鵠先來。情如故而神愈戇耳。必須時時對了義。以移情念。淨戒以全神。庶不負一夏盤桓。不負出家初志。否則魚子菴羅華喻亦可懼也。高明之自憂。能如杞人之代憂。斯大幸矣。念別情深。書此以期他年刮目。

示懸鏡

奮發之心。人皆有之。而不能不藉于外緣。羞惡之心。亦人皆有之。而不能不汨于惡習。嗚呼。娑婆國土。善

友罕逢惡緣偏盛。自非咬釘嚼鐵。刻骨鏤心。其何以
自振拔哉。惟有智之士鑒物理之無爽。達未然之禍
福。趣吉避凶。取決于心而不惑于數。故能知天立命。
超死脫生。然知天立命。超死脫生之事。人皆可爲。卽
如賢契乍聽大佛頂經。便能然香立誓。豈非真正出
世種子。但貴時時提醒此心。念念不離了義經典。則
善緣淳熟。魔境自退舍矣。勉之勉之。

傳

壁如惺谷三友合傳

壁如禪師諱廣鎬。台州王氏子。俗名立較。號伯無。父
士琦。爲大同開府。以清廉著名。師弱冠時。卽有出世
之志。禮雲棲蓮大師。取法名。受五戒。萬曆丙午舉孝
廉。甫年二十七歲。越兩大試。不第。遂慨然就選。蓋以
世爲廉宦家業甚薄。而仰事俯育之累。未完急欲完
之。以圖出世也。令新淦愛民如子。民皆感恩頌德。但
因居官事冗。戒德稍疎。戊午冬入覲。舟次荻港。夢鬼
使擇見冥王。王責以破戒事。驅令入獄。傍有冥官代
請。爲取破戒後諸事。查之。見其善多惡少。乃釋不入。

60 1 2 3 4 5 6 7 8 9

10

80

1

2

3

4

5

6

7

8

9

獄鑿兩眼釘諸柱上。及至醒悟。則雙目不能視矣。醫者進明目之藥。復夢爲冥王所罰。更以二釘入眼腔中。大痛失聲而醒。遂不服藥。告病歸鄉。就台山高明寺傍築室閒居。日課金剛般若。并大悲心咒行法。不一年漸漸復明。諸親友見其無恙。勸令再仕。師歎曰。人生幾何。猛求出世之不暇。猶暇作蝸角蠅頭活計乎。特以太夫人在。未忍捨去耳。尋思旣欲離俗。復以母在爲礙。豈可不願其母臻上壽耶。而太夫人亦女中丈夫。篤信三寶。每率其媳及女孫晨昏課誦魚磬。

琅琅恍若禪宇。遊僧過其門。必設蔬供。無空過者。嘗見有人子出家。而父母悲泣。必笑之曰。出家乃第一好事。應須慶幸。何悲泣爲。設吾子出家。吾決不作此態也。師由是得安心遠遁。荆染楚中。單身行脚。備嘗諸苦。旣登戒品。掩關閱律。并書華嚴大法。次從楚地遊歷匡廬。峰頂諸處。徐到博山。隨衆叅禪人。無知者。予適同歸。一送惺谷至博山。剃髮。師昔爲居士時。住高明靜室。曾與歸師交。今雖現比丘相。歸師猶彷彿其形。一日在衆中執其手曰。公是台山高明寺回生。

60 1 2 3 4 5 6 7 8 9

10

80

1

2

3

4

5

6

7

8

9

王伯無否。師不容自諱爲歷敘所以出家狀。且悲且喜。日見予與無異禪師辯論受戒一事最爲詳悉。因歎近來律學甚爲詣訛。本以破戒親受冥譴。久欲留心此道。而歷叩名德律王。罕有不曠曠者。予出毘尼集要示之。師亟讀亟賞。歎未曾有。遂與盟千古交。又知予方事閑藏。復以啓囑予曰。三藏義類宜總爲一書。三藏酌要宜別爲一書。諸宗集目宜別爲一書。佛事稽古正訛宜別爲一書。發菩提心集六度集宜爲二書。毘尼中衣事鉢事及授戒說戒羯磨諸事。目用

間宜行者當輯附於集要之後。梵網經雖前有二大士發明。今宜補以彌勒戒本及諸經中所說有相發者。集附本條之下。然後自出手眼以補前人之缺。亦不失爲二大士忠臣。勿以避嫌失此勝事。沙彌戒優婆塞戒俱要少有發明。附於集要以上事。凡八則。第往讀契經薄有微願。恨齒逼遲暮精已銷亡。近又作蒲團活計。故不能填也。幸逢郢匠敬附當機。倘三昧酒消尚冀奉襄半臂。不爾者當結縕帶於來生矣。予唯唯謝曰。弟亦夙有此志。可謂不謀而合。第六第八

兩事業已爲之。餘亦當如命耳。未幾南都余太僕請異師開堂。異師意欲師與我輩同行。師固執不從。遂掩關於東峰靜室。次年異師示寂。師出關襄理後事。旣畢。適太夫人以其道伴訃音至。師乃歸浙江省親。太夫人語之曰。予嘗謂子設出家。吾不悲泣。今果然否。勉矣。進修吾自善養餘年。汝子亦善能讀書。勿以此掛懷。妨出世大事也。師奉慈命。乃遊學於武林。掛錫蓮居。與新伊法師莫逆。時予自臯亭將入孝豐取道。武林復與師作數日盤桓。師囑予曰。毘尼集要弟雖

預參訂。而實未淹浹。擬從師授講。然後身服習之。不令付諸空言。但今遇華嚴法席。不能相隨。餘生若在。准於明歲入山結夏耳。詎意不旬日間。卽嬰微疾。師亦預知時至。命侍者寫囑言。留貽二子。攝心念佛而去。嗚呼。以師之敏而好學解。而能行具出世正因。懷菩提大願。謙光厚德。飲人以和真。無愧蓮師法脈。天竟不假以年。豈非法門之大不幸乎。師生於萬曆庚辰卒于崇禎辛未。世壽五十有二。法臘五年。示居學地。故衣鉢無傳。唯回生紀一卷。流通於世。佛日金臺。

法師敦法門之誼。塔其全身於臯亭山麓。時金華惺谷禪師諱道壽。溫陵何氏子。俗名啓圖。爲文學時偶得慈山大師楞伽記。閱之且讀且泣。遂發出世心。捐棄舉業專究宗乘。因父在不得出家。卽以居士身與道友如是雨海等日相砥礪。時泉南久乏聞熏緇林中。曾無一人知叅方行脚事者。師鼓舞其一二英傑。破格遠遊。從此閩中緇素始稍稍有發心。北學於江浙者。師初至匡山謁慈大師。見其規模闊大。而於商究生死一事不甚親切。遂捨之而歸博山。博山居

以別室勉以叅究。居年餘。每與異師評論甚厲。侍者多厭惡之。唯異師不以爲怪。知其別有長也。然異師法門必欲先定後慧。師自揣種性應須先慧後定。藥病不投莫能相療。因東遊武林。訪無盡法師於天台。見故友歸一師。德業俱進。疑法師必有出格鉗錘。依之而往。得閱妙宗鈔等極則教理。回視昔時慧解倍覺精細。後因劉大叅延至吳門。從吳門復遊杭州。至龍居。子是時亦在龍居閱藏。主人命師訪予。一見卽問予曰。師平日有著作否。予以白牛十頌示之。師大

60 1 2 3 4 5 6 7 8 9

80 1 2 3 4 5 6 7 8 9

悅遂欲與予盟千古交。予時心未以爲然。相聚既久。每議論佛法。輒與予破格大諍。聞者亦厭惡之。予固坦然不怪。但以其爲居士也。未必細加詳察。後因歸一師同結冬。偶商及耳根圓通法門。歸師則持公論。竟是師而非予。予方服膺。因虛心再研舊日諸諍。負墮處實居大半矣。乃共締千古盟。激令早現僧相。師以舊禮博山。旣無大故。不忍背捨。會須往彼剃度。歸師與余欣然送之。到博山。異師手爲薙髮。而未受沙彌。及比丘戒。蓋受戒事。曾先與季賢師約。必欲重復。

古制故也。庚午年春。予病滯龍居。師與如是師在南都。予誠恐一旦律學無傳。然臂香刺舌血作書促之。至。師乃同如是師來。來則禮季賢師爲和尚。覺源師爲教授闍梨。新伊師爲羯磨闍梨。力復如來舊規。如法受沙彌。及比丘戒。唯菩薩戒不重受。以其爲居士時。曾受之博山也。結夏安居。聽予講毘尼集要。而師久習宗乘。得其大益。亦未免染其流弊。竟不能畱心律學。但恐負予苦心。知金臺法師虛懷好善。遂以集要方請流通。辛未年秋。師竟以疾示終佛日。嗚呼。師

亦最奇人也。爲法門。則每觸時忌。爲道友。則每忘自身。而慧眼超羣機。辯峭拔。往往以短兵取勝。雖名禪宿。德欲與之戰。大似撼岳家軍。倘馴而致之。卽兜率覺範。豈多讓焉。予方謂博山有子。青出於藍。何意其入滅之速耶。師生於萬曆癸未。至崇禎辛未。世壽四十有九。法臘二年。金臺法師說偈而茶毘之。令其骨塔與璧師之塔相鄰。吾聞昔人欲葬梁鴻。竟要離之。慕而附近之。千古以爲具眼。金師此舉亦一快也。師與如是師同禮博山。亦同受具戒。而如是師以受師

益處最多。同雨海居士輯師平日手札。名爲筆語。而流通之。述師行紀而彰表之。執弟子之禮於身後。爲天下後世之重名。相而輕法恩者愧云。

方外史曰。二師皆予最善交也。璧慈而溫。惺悲而厲。璧聰俊而詳明。惺沉毅而精銳。璧日讀數卷。過目無不了了。惺涵泳一偈一句。動經旬月不置。是故惺讓璧之博暢。璧服惺之瑩徹。璧所至處。人皆愛之。惺所至處。人皆畏之。璧惟欲受人之益。而未敢益人。故以能問於不能。以多問於寡。乃至臨終。猶合掌問法令。

侍者代爲拜謝。惺惟欲益人。卽名自益。故從閩中至江右。從吳下至武林。無一處不與人諍辯。乃至臨終。猶追念昔時道友不置。如是師勸以宜顧自己勿念餘事。則厲聲叱謂千古安有自私自利之聖賢。噫。孔子謂不得中行必也狂狷。孟子稱伯夷下惠同爲聖人。若二師者春蘭秋菊。正不妨各擅其美。又奚必兩融始名全德哉。其與予交善也。壁師則欲受予益。不得不稍以微辭益我。惺師則欲益於我。亦不得不稍受予益。此皆其生平破格處也。獨可痛者。壁師欲

學毘尼而有志未遂。惺師旣聽毘尼而不能力學。如來正法。誰共仔肩。斯誠千古有餘憾耳。嗟乎。一月之間。二師相繼而歿。予雖猶有一二同志。然或但能受益而不能益我。或雖稍可相益。而略遇違緣。復掉臂長往矣。予更何所樂於人世。是以浩然永歎而甘沒齒於深山也。

絕餘編卷二

弟子普滋損貲刻此絕餘編兩卷奉薦

先師中白融公 先父馬應龍 先母徐氏伏願

三障圓消超生

樂土早成佛道廣度衆生

絕餘編卷三

萬益道人智旭著

門人圓果錄

序

梵綱合註序

大哉梵綱經心地品之爲教也。指點真性淵源。確示妙修終始。戒與乘而並急頓與漸而同收。約本迹。則橫豎俱開。兼華嚴法華之奧旨。約觀行。則事理俱備。攬五時八教之大綱。文雖僅傳一品。義實統貫全經。緬惟智者大師之時人根尚利。故旣廣宣教觀法門。

乃僅疏此下卷戒法。而大師精諳律宗。文約義廣。點示當年之明律者。則易開悟。今時之昧律者。則難于有餘年。久成秘典。我蓮池和尚。始從而爲之發隱。此其救時苦心。誠爲不可思議。特以專弘淨土。律學稍疎。故於義疏。仍多闕疑之處。又下卷雖獲流通。而上卷猶未開闡。嗚呼。四依大士。於法豈有吝心。直是衆生緣薄。罕能遘於希有法門耳。智旭幼崇理學。節以千古聖賢道脉爲已任。但恨障深慧劣。往往執東魯而謗西乾。後因聞自知錄序。并閱良知寂感之談。始

發信心。嗣又聞地藏本願。并聽大佛頂經。猛圖出世。於是矢志參禪。逃家行脚。雖亦數發悟解。奈何尅證無期。賴有一點慚愧。正因斷不敢錯下承當。生增上慢。以蹈邇來大妄語之覆轍。爰念宿因力薄。應須兼戒。兼教。以自熏修。先從闍梨古德法師。遵學戒之法。於蓮老遺規。次探法華玄義。摩訶止觀等書。私淑台家教觀。而毘尼一藏細閱三番。梵網一經奉爲日課。遂於發隱所闕之疑。渙然冰釋。卽上卷文古義幽。昔人所稱不能句讀者。亦復妙旨洽然現前。因擬一爲

60 1 2 3 4 5 6 7 8 9

80

9

合註以補前人之缺。而此志雖發緣障多端。六七年
來悠悠未遂。客歲藉大病爲良藥。方遂入山本志。適
如是昉公遠從閩地携杖來尋。爲其令師肖滿全公。
請講此經以資冥福。復有二三同志歡喜樂聞。予由
是力疾敷演。不覺心華開發。義泉沸湧。急秉筆而隨
記之。共成玄義一卷。合註七卷。註既成。叙厥本末以
告來哲。蓋雖不敢謂凡夫心力。實能超越前賢。而夙
有微因。今復久誦。半生淹洽。自不無千慮之一得。故
於理觀事相不惜。一一指陳。誠可勸開解篤行者之

半臂也。後之覽者。尚勿以繁瑣而厭忽之。俟解行雙
圓廻歸諸筏喻可耳。

讚禮地藏菩薩懺願儀後序

嗚呼。大法久湮。人多謬解。執大謗小。舉世皆然。寧知
地獄衆苦已隨其後。瘡痏餘報復更難窮。故我地藏
慈尊於大集會中。現聲聞相。而世尊廣歎勝德。且爲
之較量云。假使有人。於彌勒妙吉祥并觀自在普賢
之類。宛伽沙等大菩薩所於百劫中。至心歸依稱念
禮供。求諸所願。不如有人。於一食頃歸依稱念禮供

地藏以菩薩久修堅固大願大悲勇猛精進過諸菩薩故也。蓋末世之中。駕言於大乘甚易。而躬行於僧行實難。寧知廢小談大。并其大而亦非。悟大用小。并其小而亦大。故法華誠弘經者必依四安樂行。涅槃極談常住佛性尤扶戒律。今大士之功德獨盛得非亦在此乎。智旭深恨夙生惡習。少年力詆三寶造無間罪。賴善根未殞。得聞本願尊經。知有出世大孝。乃轉邪見而生正信。仍以謗法餘業雖辛勤修證不登法忍。每一展讀大士三經。輒不禁涕泗橫流。悲昔日

之無知。感大士之拯拔也。因念濁智流轉之日。與我同此過者不少。敬宗十輪。并本願占察二典。述此儀法。庶幾共滌先愆。勉求後果。不終爲無依行乎。未登無生正位。皆可修之。無論初心與久學也。

安居止觀山房序

海陽西郊有最高峯。名陽山尖。峰側有阿蘭若。名止觀山房。九華葆之初公之所構也。茂林修竹。疊嶂層巒。雲霞變幻于足端。視聽擴徹于天際。予將訪友閨中。過而樂之。且以時逼炎暑。征途不易。遂從初公之

命借此結後安。居日永境閒。蕭然無事。二三同志喜究大佛頂經要旨。因作九旬商確。商至第四卷云。我說佛法從因緣生。非取世間和合粗相。頓悟法華經中佛法從緣之旨。嗟乎。二經妙指。何其巧出一轍也。是故智者大師證法華三昧。乃攬本迹十妙圓歸于介爾一心。示摩訶止觀法門。與今經所明妙奢摩他三摩禪那。若合符節。後之箋釋斯典者。無慮數十百家。苟欲捨摩訶止觀。而別立宗途。未免轉趣轉遠。良以摩訶止觀的是如來大事。因緣的非世間和合粗。

相故也。請嘗言之。性覺妙明。本覺明妙。寂而常照。照而常寂。豈非止觀不二之真源乎。迷此真源。則寂體成昏。照體成散。是不變之性。隨染緣而成九界。悟此昏散。則散既本寂。昏亦本照。是謂不變之性。隨淨緣而成佛界。雖成佛界。真源不增。雖成九界。真源無減。是謂隨緣之理。歷染淨而終不變。夫隨緣卽不變大事之因也。不變卽隨緣。大事之緣也。故曰如來發明世出世法。知其本因。隨所緣出。知此義者。方知心佛衆生。三無差別。亦知六而常卽。修非性外。卽而常六。

性不廢修。修非性外。不墮因緣。性不廢修。不墮自然。世有徒聞止觀之名。罔窺厥旨者。妄謂但屬修成。豈識性修不二真旨趣耶。予在俗時。創聞地藏本願。而發出世之心嗣聽此經。而爲剃染之舉。歷年行脚。取益無方。於此二經。蓋不曾掛一字脚。實又不曾離却一字。後讀台宗教觀。每每引占察經以爲誠證。而占察經卽地藏大士所說妙法也。其開示一實境界。則是一大事因。其開示二種觀道。則是一大事緣。愈信如來密因菩薩萬行。一門超出無二無三之旨。誠不如來密因菩薩萬行。一門超出無二無三之旨。誠不

我歎。每思拈此妙義。點示未聞。客歲于九子別峰創講一過。今乃重拈妙義。於是隨其根性。各獲法喜。噫嘻。此雖偶緣。豈偶緣哉。倘吾與諸友。不同具此一大事因。則法性了不相關。倘吾與諸友。不以種此一大事緣。則說聽豈能投契。况此山房。旣已先稱止觀。而初公法派。復是九子傳來。當知于此大事夙緣。非淺。從此種而熟。熟而脫。莫如鈍根。聲聞于中。悉忘他年更作貧兒。馳逐也。嗟乎。智者大師。聞此大佛頂經名。字向西遙禮。一十八年。不獲覩見。後百餘年。而般刺

密諦剖脾傳來。復更淹留多載始漸流通。觀此二大士苦心。豈欲爲尋行數墨者添葛藤哉。必須教觀齊彰。因指見月。由斯典而通乎止觀。還由止觀而徹信。吾言不誣。則九旬結夏真蹕爲塵劫緣因矣。更拈一頌以裨妙觀。頌曰。頂光化佛全彰性妙。觀天成不借功。未歇狂心頭亦在。已瞻華屋戶寧窮。密因徹悟無生滅。萬行方知究竟同。魔外昇沉日去翳。菩提真路烏翔空。

題跋

合註跋語

夫本源心地。含生共有。無染性戒。日用不知。目翳而華舞。太空夢蟻。而尋釐階下。晴虛之體。依然輪王之身。如故。哀哉妄惑。枉受幻輪。勞我慈尊。現身同患。示成不倦於八千。垂化無偏於塵刹。一滴之心地。旣敷積劫之沉迷。立醒而琅函久綱半珠。僅呈繫我愚蒙。得探全寶。竭思殫機。塵培泰獄。思法緣之匪易。輒涕泗以滂沱。願我同仁。深思力學。解行同遵。自他俱利。庶得上報佛恩。不負已性矣。

60 1 2 3 4 5 6 7 8 9

70

1 2 3 4 5 6 7 8 9

80

1 2 3 4 5 6 7 8 9

題畫

華林開士性癖山水。六十初度高足葆公圖山水以壽之。羣峰列秀。空亭寂然。見道不見山也。見山不見人也。或曰掌亭人得無入隱身三昧耶。子曰。此正入普現色身三昧耳。東坡不云乎。溪聲盡是廣長舌。山色無非清淨身。雖然此猶是門外語。且道如何是門內語。見山依舊山。見水依舊水。若向這裏會得親切。便可向開士祝無量壽矣。

題等韻

光音以上覺觀永離。不復以音聲爲教體。世界初成。梵天再立始共呼爲薩埵薩埵。此語言文字之始也。風土既殊。以字代音而梵韻不可復考矣。後之賢哲創爲三十六母以辨五音。至今相沿習學又成故套。試研問久學尚未委其源流。他何足云。嗟嗟。文字性空緣生。故有一音一字。咸卽法界。所以衆藝童子唱字母時。一一無非般若波羅蜜門。而今於因緣所生法中。尚未知其端的。况能知此音性字性皆悉卽空。卽假卽中。頓成三般若耶。雖然。法無迷悟。迷悟在人。

60 1 2 3 4 5 6 7 8 9

10

80

1

2

3

4

5

6

7

8

9

續食經

卷三

觀照爲實相之門。文字又爲觀照之門。則此一帙未始非諸佛智母。縱令習而不察。如貧女寶藏雖未受用。不可謂無。况今書者讀者文孰非善財眷屬哉。

刻般若照真論跋

夫般若無名。一切法皆般若之別名也。一切法無體。般若卽一切法之自體也。一切法不可名故般若亦不可名。般若無別體。故一切法成無別體。世有欲借語言而顯般若。欲絕語言而顯般若者。皆未達甚深般若圓融三德者也。何謂圓融三德。一實相般若。二

觀照般若。三文字般若。此三非三亦非定一。以一切皆實相。一切皆觀照。一切皆文字。故是故六百卷全帙而非多。二百六十餘言而非少。乃至後賢述作。無慮數十百家。了得卽字字解粘去縛不了。則字字加縛增粘。澄公照真論亦其一也。此論自北而南。流通已久。惟新安尚乏聞熏。賴普門安尊宿携入黃海而積。如厚禪師旋爲繡梓。觀二老苦心。直欲令見聞隨喜者當下卽與甚深般若相應。豈可更作借言絕言兩法會哉。若于此論不作借言絕言會。則于六百卷

經于一大藏教亦不作借言絕言會譬如一星之火
徧燒原野予拭目俟之矣

酥臘宣可更計雷吉

血書法華經跋

卷三 言少直於今良識

夫一切佛語皆羣靈之眼目。子聖之慧命也。況無上妙法乎。一切讀誦受持皆般若之真因。渡苦之寶筏也。况刺血爲墨乎。而掠虛禪者惟事高談名理。罔知眞實行門。吾以爲彼直未悟理耳。設真悟理則一切行門無非妙理。有何事相可薄。理性可尊。况衆生無始我執恒重。若宗若教對治咸急。正宜借此微因充

而至于三祇大行。俾正使習氣與舌端皮肉一齊破盡。可謂卽事而理。卽漸而頓。奈何棄此真實功德。而以空談當妙悟哉。惟乳生法友夙植正信。年方應法。遂作此不思議功德。是故歷參知識。不染近時禪病。今又將篤志教觀深入斯經堂奧。夫非因真果正。形直影端之一驗耶。將來親見靈山一會。儼然未散紹智者大師真正法脈。方知一點一畫無非全體法華三昧。決不誤認無相安樂行。猶在有相安樂行之外也。請卽以吾言爲券。

書東

復水部胡善住

病卧山中忽接手教。愛我切而規我深。自非金粟後身。不能說此希有法也。入正位人尚應泣聲震動大千。况我大心凡夫。其能漠然於衷耶。但自利利他事亦須知彼知已。知時知勢。貧衲每每自反。世謂我持律第一。實增慚懼。姑無論三聚十支八萬微細。卽比丘一百五十戒相。雖於閒遮持犯之致了了分明。而未能行其萬一。又無論遮罪中除飲酒過午三條餘

皆未淨。卽性罪七支。能免故殺而不能防誤殺。能不錯因果。不敢以三寶物私自取用。而不能磚錢決不買瓦。猶如古人能執身不犯世間男女。而不能夢寐清淨。能不作妄語兩舌。而不能無惡口绮語。良由多劫以來。乘急戒緩習以成性。遂大段著力不得。是以恥躬不逮。今已退居沙彌位中。萬萬更無弘戒之理也。惟宗乘中事。未出家時。先已留心苦叅十載。頗辨真偽。而當世禪流。反以我爲夾襍教律。橫生邪慢。次則教觀。一途叨仗。夙因頗窺堂奧。而近時學士。復以

我爲未歷講席。自設町畦。捨此二法。更欲以何法度人。總之時未到。勢未乘。惟有山中苦行。以消夙業。正欲養成毛羽。庶望高飛。待佛法現。前用副梵王勸請。非敢固爲石隱。蓋元元於度外也。一夏病劇。秋來稍痊。但瘡症如故。須聽其自止。非藥餌可制。初入山時。於地藏肉身塔前拈得先閱藏闈。今聊以法喜資神。似較參苓倍勝。山中澹泊。冬衣典盡。蒙賜路費。本不宜領。以寒戚將逼。遂用贖之。亦足見因果不甚分明。戒律疎緩之一端矣。遙向丈室懺悔。非敢言謝也。病

筆草復不莊不次諒之

復韓蓮洲

曩在吳城養病。兩月備蒙仁者暨一切緇素善友道愛殷勤。詎忍忘之。特以出家本志。分毫未酬。濫膺人世虛名。實深慚悚。不得不避迹深山。再事苦修。圖得一當以報知已耳。不謂夙業所追。無地可避。一夏病苦。空消天日。猶仗地藏弘慈。得以不死。今且閱藏。作者述資糧。倘倖未墳。壑冀滿梵網。占察二願。蒙諭天池。華山之間。雖亦甚妙。總以人情太熟。取靜爲難。故

悉達大士尚須遠居雪山。况我凡夫。豈容戀戀故鄉耶。經云。自未調伏。欲調伏他人。自未度脫。欲令他度脫。無有是處。不肖正爲深念父母之邦廣及法界。有情廻誓于山中修道。以濟度之。非敢急於自度也。夙願所牽。致違尊命。罪何可言。然仁者善能設身處地。當不深咎耳。賤恙雖未愈。大約得過十一月後。或有生機。日下計星。守命未免受其侵蝕。總之道力羸弱。故使五行有權。思之可悲。言之可憐。附去幻寓華嚴。四偈博笑。餘惟爲法爲衆生。善巧調攝。至囑至囑。

復卓左車

靈譜印叢一木頭山法建寺題詩

病臥深山。尊使晚到。強起呼燈。捧讀尊翰。道愛殷切。溢於言表。兼以尊使暨北溟禪人極道盛意。不啻口出銘之五內。但貧衲此番入山。雖非究竟。作石隱計。而痛念大法傾頽。綿力難救。姑作數年苦行。以俟人定勝天耳。承謬舉於宗伯葉公。謂爲宗說俱通。解行雙到。試自思之。實增慚愧。倘以古人之俱通。雙到相比。未免楚然。倘以今時之俱通。雙到見稱。又未免覩然矣。每憶出家本志。似不在釋迦之下。數年被道友

所奉致令虛名盛而實行微。多方作入山計今始半
遂。正欲深之又深能爲居士一人頓改節耶。且秋間
徹因持胡善住東來悲愴懇切塊爲墮淚而貧衲亦
竟付諸漠然。今忽應居士命則胡公其謂我何。耑此
附復。統祈慈亮葉公篤信斯道適膺宗伯之任靈山
親屬克副無疑。企羨企羨但山野病夫不敢浪通名
字敬以原東奉繳

復陳曼昭

侍道友爲命脉。而衆生習氣各有偏重亦復不能如
水乳合。與言及此惟有血淚橫流而已。利名兩關從
來羈絆我不得。非適今也。迺極相知人。猶然以名利
見疑。所以誓朽此骨於深山。不甘受千古誣謗耳。居
常謂壞法門者皆由於擇法門人。如齊桓晉文。尊周
適所以壞周。方痛懲之不暇。奚忍蹈其覆轍。獨有出
家一點初志急欲尅獲聖果。而悠悠十五六年。竟成
虛度。慚天愧地。夫復何言。卽此十五六年行脚。打破
面皮。放捨身命。僅開得名字。卽佛位中一隻清淨肉

眼於佛菩提了了得知歸家道路明如指掌而形枯氣索前進爲難意欲傳得一人勿令最後佛種從我而斷亦竟未遇其人嗚呼痛心又惟有夢寐永泣而已慧公來伏讀手教秉承厚施愧不能消然訊知居士近况所處頗艱而道念益固深以爲慰或我佛遺法將來不至永墜尚有否極泰來之機其終藉手於居士乎每觀種種邪外之流其智甚短其說甚陋猶足以簧鼓天下後世有述者大底別有一段徹底精神以持之耳况將徹底精神持此至妙至深正法豈

反不能弘於天下垂於千古倘不能弘不能垂只是我輩精神未曾徹底但當自反自勵不必他求也船子身葬水中而夾山乃大弘其道荆谿以居士身參學多載後方出家一世不登法座而其書乃傳之萬世不可磨滅宜聖之木鐸孟軻之好辯皆此類也此意願與居士共之雖未獲一第亦奚足憂當勤心道業誓續佛祖慧命爲急務耳如是師帶病遠來期共作山中朽骨不意寺內三喪相繼未免內顧之憂勉強勸其一歸了世間幻局賴有此人差慰鄙懷但身

亦多病竟未知誰死誰手也。山居百八偈附呈清覽。又附戒消災經畧釋一卷。知居士必能得意於語言文字之外。其餘著述未能一一持上。統俟後緣。賤恙仗庇僅痊。但久病之餘。非復向日精力。一息尚存。惟以著述念佛爲務。俟金蓮現前。便長揖西馳矣。

復智龍

逃名於萬死之後。已悔其遲。傳法於一隙之天。倍見其拙。然生平受用惟是多虛不如少實一語。庶不致以身謗三寶耳。故退戒一事。雖痛心於歸師之負盟。

亦以爲今比丘則有餘爲古沙彌則不足。寧捨有餘以金不足也。來翰謂法門中事大可痛心。誠然。但非時食戒。遂因將就上下相安而毀之。將就二字。是獅象家風。是狐兔習氣耶。語云。躬自厚而薄責於人。則遠怨矣。其身正不令而行。有諸已而後求諸人。無諸已而後非諸人。觀足下舉動未出常流。徒欲漫增感慨。恐傍人之感慨足下者。亦不鮮也。詩云。其曰予聖。誰知烏之雌雄。孟子曰。以燕伐燕。荷爲勸之。不肖於足下亦然。自此以往。更當學莊生之不庭耳。

寄徐雨海

幻住一別音信杳然令人懸念無已。世道愈惡病障日增。遂於丙子初春作長往之舉。埋名易字暫寓九華以養沉疴。不意如是師迺於臘月初八夜忽從天降大驚大喜未及作禮便問雨海安在。如師沉吟未答連問至三方述居士的信甚爲悲切亦甚爲慶幸以居士生長富貴從不知世間些小苦事。況受此大苦故應悲切。以居士雄才大略膽識高曠負蓋世之資具千古之學懷聰明慢眼空天下。世出世法粗心

浮氣未入甚微細智法門。自非此等惡辣鉗錘何由得入聖賢闡域佛祖堂奧。子輿氏曰。天之將降大任必先苦其心志乃至行拂亂其所爲。此實可慶可幸。但於動心忍性四字不妨十思百思廻圜中第一法藥也。向曾深識居士不宜輕舉妄動。不聽芻蕘致有斯患。然惺師每言因錯得妙。跌法從他得。今於此局益驗不誣。乾之上九曰亢龍有悔而不食之碩果轉爲不遠之復。復之象辭曰至日閉關商旅不行后不省方。即是潛龍勿用之意。盈虛消息通於至道。於通

60 1 2 3 4 5 6 7 8 9

10

80

1

2

3

4

5

6

7

8

9

起塞卽塞成通台觀所以貴善識也。如是師正擬與貧衲同隱九華作潛修著述計不意滿公演子旣已西馳直院湛公亦復長逝還一乃遣晦文遠來哭請似不得不作歸局。貧衲亦萬萬欲與同行奈此間尚有小事未完須一完却徑至泉州閉關靜坐俟居士難星退舍把臂於蓮寺戒壇前也。自臘月初八閉信每日爲居士持大悲咒七徧以脫難爲期愧凡夫乏神通力聊盡此心而已。萬祈爲道自愛自勉種種閑懷并筆所罄

再復陳曼昭

聖祥歸又荷厚供兼讀手札稔知大願大悲真可謂不忘靈山親囑銘企何已但不肖以病廢之餘勉爲二三同志作村學究訓蒙勾當何敢濫膺弘法之名而長于大道場地既有賢主人復有大護法自必有福慧並隆巧逗時機者出而應之豈不肖秦時鍛櫟鑽所宜居此位哉古人云改弦易轍不如就路還家如不肖者正宜幽至究竟如居士者正宜鬧至究竟鬧至究竟鬧卽是幽幽至究竟幽卽是鬧長于九子。

不隔微塵。居士久悟斯旨。何猶示同未悟耶。梵網合註。仗庇幸已閣筆。共計十萬餘言。未遑錄上。先以緣起呈正。壇中十問。性學開蒙。二友合傳。并塵清覽。嚴冬在邇。伏惟爲道爲生。珍攝不在言。

不苟恭靜。持戒清淨。主客賓主。更替大願。持真如法。面東又寄陳旻昭。釋迦本覺。主人真性。大願。持真如法。山中寂寞。屢蒙厚施。爲謝。但愧涼德。不能消受耳。每念大法垂秋。亂臣賊子遍滿天下。邇年勢雖稍衰。而正法受其剝蝕。元氣殊覺難復。似未可欲速也。貧衲以孤孽之身。漫抱嬰杵之任。而所交碩友。仍多內變。

是以感傷切體。聊附虞仲夷逸之科。遺茲餘喘。冀早生安養。然後乘本願輪。還來度生。縱令未墮溝壑。不終石隱。亦斷無卽遊王舍大城之事。萬祈慈諒。勿致徒費。往還重招妨命之愆也。居士竭力弘護。卽此是大學問大精進。古人云。從緣薦得。相應疾就。體消停得。力遲。又云。向上事須從向下會取。豈欺我哉。但貴善自著眼而已。聖譬則力。智譬則巧。雖苦苦相拄。非復巧力所及。終亦不離巧力。居士以爲何如。榔梅居士夙欽道風。乃復佳覘。遠頌尤徵樂善之懷。愧感兼

60 1 2 3 4 5 6 7 8 9

10

80

1

2

3

4

5

6

7

8

9

集但山野廢衲不敢浪通名字。統祈鼎言致謝爲囑。偶讀地藏三經述出讚禮懺願儀一卷擬作救時單方。未審當尊意否。餘情非筆舌所罄。統希心照不宣。

寄韓蓮洲

客歲閏月得接手教。不覺又易歲矣。流光如駛衰病相仍。捨却樂邦。何處送想。此意願與仁者共之。故鄉本卽法界。我今不離法界。卽是不離故鄉。設更欲飛錫。故鄉則故鄉。又在法界外矣。至于度人桑梓。自是入塵垂手邊事。不見悉達囑車匿云。設我骸骨枯腐。

不盡生老病死之原誓不返還。豈可謂悉達置故鄉于度外。又豈可謂不肖今已成道。不比踰城出家時耶。仁者屢遭拂逆。當是夙因所感。亦是今生善力深厚轉重受輕之局。但于隨緣消舊業。更莫造新殃。二語不妨再思十思。必自有解脫路也。地遠緣疏。音問不能相續。惟神棲安養一念。千里同風。終不以睽違爲隔耳。

寄靈隱兄兼訊影渠

病臥荒山無時不念及仁兄。仁兄眼目志識俱足。千

古而不能千古者只是欠剛骨也。久欲作一方便爲二兄結伴修行計。無奈福緣淺薄兼以惡疾纏身。今疾雖漸愈緣似尚慳。亦祈仁兄挺出剛骨俯就幾分。則深山坐對庶可期耳。合註緣起壇中十問附政向蒙許華嚴大鈔未審何時發來。意欲細閱一徧求其與台宗真實相出入處庶可息從前諍論爲申積冤否。則悠悠門外之談殊未足憑據也。聞二兄于台宗教觀已有信入。猶願潛心討徹源底爲他日相晤時快談張本。嗚呼。流光如駛。衰老日侵。旣自反而痛心。

乃敢爲同志饒舌。幸勿罪其狂瞽。影師近日法體何似乞示好音。

復項居士

回音藹然深悉道况兼承厚施爲謝。但細讀扇頭和偈未免落在口頭三昧。大似初生牛犢不畏虎。居士向本正信篤實今何忽弄此虛頭耶。豈不見古人錯下一語五百世墮野狐身。奈何妄談般若作拔舌犁耕種子。萬祈戒之勿視作等閒也。山僧一行一止各有因緣漫以趙州相擬殊爲未確。夫帝鄉可遊也。飯

60 1 2 3 4 5 6 7 8 9

10

80

1

2

3

4

5

6

7

8

9

戒之心不可忘也。詩偈可作也。籠侗套語不可襲也。紅塵堆裏學山居。風塵何能染人。只恐人自染風塵耳。後會未期。聊進藥石以酬一日之知。餘非所計。臨楮神馳。讀書今詩以吾其靈而無不景古人。雜文。茶亦日更三報大通寺主半靜不要火。溫陵開元寺肖滿師伯文。出贈銀額嗚呼。水漲船高泥多佛大。從來間世之英豪出現。未有不因培植厚德而致之者也。予之得稔知老伯厚德也。因獲借交於高足如是昉師也。而昉師之與予

莫逆也。則又因惺谷壽師聯出世盟也。惺谷以居士身倡修證法門於泉州佛國。是時法化久息。疑謗頗多。獨昉師極力爲之表裏。而老伯實克成之。至於昉師同壽師行脚。徧參海內知識。徧交海內勝友。費却草鞋錢。凡若干數。盡取給於老伯之精舍。會無倦色。又老伯每以淳厚雅度。化導縉素。目擊道存。不言而喻。且勤營福業。不吝鉢資。供養三寶。惟虞簡缺。是以法事之殷勤儀節之周備。不惟溫陵一境親炙成風。而八閩上下。亦且聞風興起。無怪乎其克享眉壽允

裕後昆也。嗚呼。末世障深競騁狂慧持戒修福鄙其有爲。匪藉先輩孰爲典刑。老伯固應任世一劫。昭示未來而蓮蓋欲敷侍者不請。遂踵隻履之風。豈不痛哉。予每悲法道陵夷。魔外充斥。目不忍見耳。不忍聞。遁迹深山。甘羣野獸。而昉師猶衝風破浪冒死捐生。尋予於數千里外。法道重於丘嶽。身命等於鴻毛。雖剛骨弘誓。稟自夙習。其受滋培於老伯者。亦豈可思議也。獨嗟昉師初出老伯旋終。於世法中。不無永別之恨。然得此賢嗣。毅然以荷擔法門爲已任。克其志。

操決堪光顯如來道化。則老伯亦誠可無憾矣。予聞諸儒禮云。知生者弔。知死者傷。予雖不獲親奉慈顏。迺藉昉師而神沐至德。今之望薰風而灑淚。不亦宜乎。

弔知白文

嗚呼。習俗移人。賢智不免。法門日替。僧體益卑。求其矜然有以自拔者。幾何人哉。維我知白朋公。托迹名山。希心禪理。不染時流之陋習。克臻先哲之典型。秉歸戒而畢志茹蔬。聞佛乘而欣懷染指。力疾投身于

萬德洗心畢露其千尤予方慶繙侶有人山靈增色擬從閩地言旋永締蓮邦淨社誰謂暫離三月之間遂作千秋之隔嗚呼無常巨力抑何奪吾良友之速也四十六年幻夢雖然當下圓消九十九峰家業畢竟憑誰同紹見其進未見其止已堪爲法門歎惜可共學未可遁道尤足爲身心隱憂公靈不昧必能憶大乘止觀法門信淨土橫超捷徑則千佛社裏雖少一人九蓮池內新敷一萼公旣死而不死予亦怨而無怨矣公其含笑而存鑒之

疏

萬鉢緣疏

一滴水耳而蛟龍得之爲雲爲霧普洽寰區其功果在於水耶果在於龍耶果非水與龍之功耶謂功在於水則均此一滴胡以日曝之而乾火炙之而亦乾卽渴人飲之亦不足以潤其舌謂功在於龍則置諸高原尚不免有熱砂之痛宛轉之苦謂功不在龍與水則胡以二物相遇遂得相成龍既不可思議水亦不可思議噫此亦可以悟法界妙理矣而更可以喻

修證要門。蓋水猶福也。龍猶慧也。水龍之性。卽真如法性也。倘水性非真。如性本不能周徧法界。縱遇真龍。豈能令其騰波湧浪。倘龍性非真。如性本不能神明出沒。縱遇真木。豈能令其變化飛騰。惟以稱性之水。龍御稱性之水。則龍靈而水亦靈。亦惟以稱性之水。得稱性之龍。則水妙而龍更妙。福慧二途。亦復如是。修福不修慧福。則有漏有爲。有分割。有窮盡。修慧不修福慧。則無光無燄。無力用。無莊嚴。惟以稱性之福資。稱性之慧。如得水之龍。雖小亦不可欺。亦惟稱性。

之慧。作稱性之福。如遇龍之水。雖少亦不可盡。而福慧二輪。又惟以同一法性。故皆不可思議。倘一座福聚。本不等於法界。胡能使二錢微供頓超。匪王四十里燈。倘一念真明。本不徹於全體。胡能使一放屠刀。便預賢劫千佛大數。是以修慧必須真莫類蛇虺之不能騰駕。修福不須擇莫如海鼈之但誇水多。然慧門嚴真偽之辨。取捨貴精。福門融大小之岐。隨緣愈妙。所以出家三學。討究歸於師友。日用四事。供膳托於檀那。師友必擇。而後精檀那必等。而後普欲行等。

60 1 2 3 4 5 6 7 8 9

10

80

1

2

3

4

5

6

7

8

9

慈誠莫若萬鉢緣之設矣。人輸一鉢爲力甚易。集之成萬爲福甚多。如一室中具足萬燈。一一燈明各徧室內。當知施一鉢者卽已圓具萬鉢功德。又况燈燈相續。燄燄轉明。熟食除暝。功德一切。寧止於萬鉢功德而已。多亦法界。少亦法界。少卽法界。故施一鉢者不必愧其薄。多卽法界。故施無數鉢者不宜厭其奢。古人云。善人行善。惟日不足。華嚴云。十大願王。無厭無足。請於此法性海中。興大法雲。注大法雨。滴滴總歸大海。莫問斯水何來。亦莫問斯水何去矣。

蘊空精舍募建華嚴閣疏

自佛法流傳震旦。經帙之最富者莫若華嚴。其最簡者莫若心經。心經語僅數百。雖童子亦能誦之。華嚴則浩然八十餘帙。雖老宿亦未必盡諳也。顧究其旨趣。廣略互收。只如心經見五蘊。皆空一語。人皆知之。第未審其以何爲照也。若照以邪慧。則謂死後無相爲空。若照以聲聞般若。則六分推析。覓我了不可得。爲空。若照以緣起般若。則體虛無性。如幻如夢。爲空。若照以不共般若。則二邊叵得離過。絕非爲空。惟

60 1 2 3 4 5 6 7 8 9

10

11

12

13

14

15

16

17

18

19

20

21

照以甚深般若。則色等諸法全卽法界體。絕纖塵量窮橫豎。徧具徧含無障無礙爲空。依此修觀。則法法隨心。名觀自在。塵塵圓具。亦名普賢妙智融徹。亦名文殊大慈普覆。亦名彌勒法身真常。亦名毘盧。上中下三部華嚴一言可蔽巍巍寶閣。煥乎在心目間。更何俟謀。諸土木耶。雖然華嚴以六相明宗。不有壞之孰爲成之。不有其別。孰彰其總。不有其異。孰顯其同。則土木一案正不可少。十玄門中所謂托事表法。生解也。舉凡輪栗布金者。一切與此甚深般若相應。如惺他

空合空。如水投水。人人歡喜鼓舞於自性中。何必更贅一言爲勸。而又何妨藉此一言爲勸。以此一言亦全是法性故。王募事僧爲惺。凡開士請以此法自惺惺他。

海燈油疏

劫初時人有身光。不假日月光明。身光漸減。日月出生。而日月光明復有時不能徧照。則繼之以膏火。此膏火功德。不惟等於日月而已。日月照臨屬於悲田。燈火供養。悲敬雙具。又况地藏大士。以無緣慈力。同

體悲心。示居九子峰頭。徧救塵沙含識。肉身靈塔。四海歸依。由是有海燈之供。表善信之微忱。當知一莖光。照全彰自性妙明。緣善既發。正了同顯。倘謂此是事相。或是塵緣無關修證者。則離事談理。離境覓心。理若龜毛。心同兔角。誰與萬善莊嚴成兩足果。昔有一賊。因盜寺物。爲佛剔燈。光明尚感多劫。身有光明之報。况以好心施供。藉大士慈悲。俾燄燄普燭幽塗。方將續如來慧燈。耀法界寶炬。若自若他。同開長夜幽闇。又豈止生死中之樂報已耶。請速發心。毋貽後悔。

芙蓉閣建華嚴期疏

此山自李青蓮有秀出芙蓉之句。而九華之名始彰。今印如開士構一樓於化城寺側。稱之爲芙蓉閣。倘亦有味乎。青蓮句也。開士復發弘願。卽于此閣轉大法輪。欲建三年華嚴道場。僧侶以十二爲數。檀越以八十一爲緣。每緣于一年中。助米一石二斗。助銀一兩二錢。共須八十一緣。或一人獨任數緣。或幾人共成一緣。無不可者。圓滿之日。仍以懺摩回向法界。甚

60 1 2 3 4 5 6 7 8 9

10

80

1

2

3

4

5

6

7

8

9

盛舉也。開士旣發此心，兼徵予一言爲勸。予每謂地藏本願一經，當與八十一卷華嚴並叅。華嚴明佛境界，稱性不可思議。本願明地獄境界，亦稱性不可思議。一則順性而修，享不思議法性之樂。一則逆性而修，受不思議法性之苦。順逆雖殊，其爲全性起修，全修在性，則一也。吾人若一念迷佛界，不思議性則常寂光土。應念化成刀山劍樹，爐炭鑊湯。若一念悟地獄不思議性，則泥犁苦具。應念化成普光明殿，寂滅道場。迷悟雖殊，其於性德無增無減，又一也。然性德

雖無增無減，非逆非順，不屬迷悟。而迷之則爲九界逆修，遂感分段變易二死苦報。悟之則爲佛界順修，遂成菩提涅槃二種轉依。迷爲三惑悟爲三智。逆修爲十惡五逆，順修爲六度萬行。生死爲三界四相轉依。爲三身四德苦。卽法身惑卽般若業，卽解脫。謬所謂推人扶人，只是一手。讚人毀人，只是一口。大佛頂所謂如木成冰，冰還成水，誰不信然？則芙蓉九朵，信可與華嚴九會同其表法。豈謂地藏本願經僅談地獄因果事相而已？况華藏世界安住於大蓮華中，如

來成道亦復坐寶蓮華而優鉢羅波頭摩等地獄亦復名青蓮華赤蓮華可見一名一喻一事一法皆悉具足十界誠在當人之迷悟順逆何如耳不思議法性體非羣相不礙諸相發揮又奚間於地獄及寂光哉願開士率諸檀越及誦經縉侶卽以此爲順修因緣開發正悟則鐵圍兩山卽是金剛菩提道場無令火燄幻作金蓮如慈悲懺法所云斯大妙矣是爲勸九華山營建衆僧塔疏

福田有二曰敬曰悲敬田以田勝悲田以心勝供全

利而福等虛空敬田也澤及枯骨而萬世稱爲仁至悲田也但有一田功德已不思議况悲敬具足者乎悲敬具足則天下叢席之普同塔是也夫羅漢四果證入無生永離我執旣入涅槃不復愛此朽骨凡夫比丘未斷思惑倘尸骸暴露則神識不安神識不安可悲也堂堂僧寶可敬也矧凡聖莫測安知肉眼所謂凡僧非卽大士所曲示乎是故隨供一骨罔不具于悲敬二田此卽小小道場必備此事維九華爲天下第一名山迺乏茲要典耶然九華亦非全乏奈前

人作事草率不足垂於久遠。致令荒原暴骨悚目傷心。予初到山。首以此事經懷。因病苦所困。不克議始。今賴大士弘慈惡疾退舍。方擬捨身命而力營之。適有衆位者宿無不先得我心。而又十倍予力。相與快爲鼓舞。予遂不揣陋拙。僥言倡始。兼願集百金以助厥成。其有見聞隨喜無論。若繙若素。但肯隨喜樂助。亦無論若干多少。旣投最勝之因。必克無上之果。敬則成佛道而有餘。悲則度衆生而無量。係以偈曰。

僧相堂堂福德之灝。縱令朽骨福性奚改。起塔供養。

應至梵天。況復丈許詎云不然。三百餘金衆緣成就。銖兩分文。成佛無謬。彈指合掌。的的真因。誰爲證佐。妙法華經。此一章中舉大

止觀山房改向文疏

昔世尊將成正覺。登一山頂。山爲振裂。世尊念曰。得母我夙障耶。山神跪而白曰。非是菩薩夙障。祇緣斯山淺薄。不足載如來成道耳。去熙連河側不遠。有菩提場。周匝千里。金剛所成。三世諸佛咸悉坐此成等正覺。佛如其言。詣彼成道。由此觀之。風水所係亦大。

60 1 2 3 4 5 6 7 8 9

10

80

1

2

3

4

5

6

7

8

9

矣。世有高談唯心。蔑視風水者。詎思一切唯心。則風水獨非唯心法門乎。是故華藏莊嚴世界。海安住無邊香水海中。無邊香水海依大風輪而得安住。此卽風水之本源。而唯心之極致也。今于此法界安立中。有塵許娑婆。娑婆中有塵許支那。支那中復有塵許之新安陽山尖。而塵許之法界不小。華藏之法界不大。擬欲向此一塵中轉大法輪。奈向日所定方隅。未為允妥。事須改作。方得依正相稱。蓋不必再作布金之侈費。便可坐收熙連河畔之奇功矣。深信唯心法。

門者請于此薦取持地圓通

絕餘編卷三

助刻芳名

| | | | | | |
|------|------|-----|-----|-----|----|
| 賢菴 | 海蒼 | 德賢 | 傅福 | 性超 | 常融 |
| 性溟 | 性學 | 顯悟 | 秉才 | 寂洪 | 照衡 |
| 傳善 | 弘淨 | 定瑞 | 海秀 | 覺心 | 如明 |
| 傅照信 | 傅照蓮 | 傅普見 | 傅普敬 | 照安 | |
| 傅普持 | 傅普善 | 傅普壽 | 藍元善 | 章明生 | |
| 弟子照芳 | 照瑞全募 | 寶全 | 性印 | | |

絕餘編卷四

萬益道人智旭著 門人圓果錄

讚

觀音大士像讚

白者是紙黑者是墨。何處有紫竹林。甚麼是磐陀石。
希有大士無作妙德。不向空中現影。偏借靈於手筆。
識海波澄月影寒。蒲團葉翠苔痕碧。善財合掌是何
年。同體大悲親薦得。只今頂禮復是誰。圓通還向耳。
門入。南海波斯到岸來。明珠價直微塵國。

總目錄

卷四

海潮大士像讚

疊浪層波。一倫圓照。磐石嵯峨。毘嵐鼓竅。加趺坐斷
綠苔痕。動靜融歸。聞性妙。大悲三昧。瞽相親。鼻端徹
聽巖花笑。

蓮舟大士像讚

波翻浪湧。性定心澄。慈心三昧。霧靄雲蒸。咄蓮華一
葉輕如許。法界收來勝不勝。

海湧文殊像讚

一片青山無邊波浪。動靜不生奇形異狀。湧出賓道。

文殊在上。大智勇猛識風鼓盪。若欲思量。命失身喪。
嘆如意拈來觸背。融白毫全體光明藏。

十八應真像讚二首題貫休真蹟

出山七尊

石梁橋畔煙樹古。中有峭壁方廣戶。石梁橋下水流
急。曇花燦爛侵眉宇。應真見道不見山。出壁登橋任
仰俯。風動幡動兩無關。回首依稀識師王。獅聾豹變
不驚情。梵冊華言覲面呈肩輿。坐斷十方界。力士安
知脚底輕。拈來拄杖沒巴鼻。玄機問取徐行磨。下座

60 1 2 3 4 5 6 7 8 9

10

11

12

13

14

15

16

17

18

19

20

21

22

芒鞋誰未破。卓哉難弟復難兄。

水閣十一尊

波濤萬頃噴山顛。樓臺幻出雲霞聯。乞士何時應供返。袈裟染馥鬱沿龍涎。杖藜斗笠閒。家具有鉢盂。布袋空相傳。化城寶所誰遠近。古木巖花孰後先。龍王翹體迎還送。風不揚塵石自動。倚欄共聽海潮聲。聞機刹脫虛空痛。天際茫茫識浪平。涅槃生死鎔情凍。老僧手腕具神通。筆端三昧稱如夢。

達磨祖師像讚

一句安心語。萬劫繫驥橛。轉得鼻孔來。虛空出鮮血。
怪底東施強效顰。却令西子蒙不潔。何如分付老雲門。
早與瞿曇同打殺。驀地西來大似無風起浪。更加折葦。不免眼下裁眉。饒君面壁九年。落得弄巧成拙。賴有楞伽四卷。且喜救却一半咄。逢人切忌錯舉。

九華化城寺大圓禪師像讚

咄咄老僧不唧噥。漢性火真空兩重公案。八十餘年賊已追。留下家私誰共算。大圓光裏笑呵呵。邈出真容只一半。任爾人天供養繁。面孔依然歸那畔。

60 1 2 3 4 5 6 7 8 9

10

80

1 2 3 4 5 6 7 8 9

龍庵老人像讚

海潮大智尤子龍菴。但修實行。不貴空談。視十方爲一體。杜後裔之癡惑。披紫衣而慈容坦坦。執明珠而佛號誦誦。神雖久歸安養。名猶昭著東南。夫惟煥慈風於無盡能令禮遺容者。宛如面叅。

博山無異師伯像讚

有序

予昔送惺谷禪兄薙髮始晤師伯。追隨至金陵而別。盤桓一百餘日。每談及法門流弊。擬相與共拯之。不意僅年餘而師伯示寂。遂令予獨掌隻輪。不

能浪鳴單運。豈不痛哉。邇來頻見爲宗匠者。輒以東瓜印子印人。致使宗風掃地。繩懷師伯受用壽昌。不肯二字。終不以佛法作人情。凜凜有古人風。倍切思慕。適知十禪兄以遺像索題。悵然久之。合掌讚曰。

貌偉神豐。心慈體勁。向空觀以入門。從壽昌而斷命。堅持不肯家風。痛洗今時禪病。旣存徹困婆心。何必單提正令。只嫌一句葛藤。畱與兒孫作話柄。沒踪跡處。莫藏身。老婦依然猶歎鏡。

60 1 2 3 4 5 6 7 8 9 10

80 1 2 3 4 5 6 7 8 9 10

淨信堂銘

我所住堂皆名淨信輪相初開破疑前陣五悔功成
至心發軔二觀圓融隨機善進平等法身三昧中俊
觀察已心念佛正印決定應離雜亂垢爐三忍四佛
康莊非峻

梵網室銘

我所住室卽名梵網十方佛法猶如觀掌文字性離
非默非響更言不立無端成兩心地法門戒光森爽

性修交成實相斯朗法報化身體方且廣華藏莊嚴
鏡中現像

墨銘十六首

靈光獨耀

性色真空性空真色一字法門圓融萬德

赤澤摩尼

徑寸妙寶五天價高穰穰珍雨稱性無勞

瑠璃液

三

南垂須彌內外明照印徹香河色塵圓妙

烏金髓 四

寶明生潤天一地六神丹告成名歸仙籙

空青乳 五

蘊結何依津流非淳點開普眼法界洞視

紫雲根 六

舒卷無性出沒有端瀾空梵宇五眼同觀

舍音七

四辯離微如來之藏法鼓未撾魔軍先喪

攝電八

慧雲瀰覆警蹕開盲刹那三昧耀徹幽城

驪珠九

探之領下出自深淵高幢懸置光燭大千

禹璧十

治水功成恩垂永世玄之又玄非從人製

月華十一

剛中習坎克粹其精照此長夜識海澄清

霞爍十二

非水非天亦真亦幻映彼金沙優曇方縱

60 1 2 3 4 5 6 7 8 9

10

80

1

2

3

4

5

6

7

8

9

凝碧十三

迴矣霄漢呈此佳祥點畫未兆文彩已彰

蒼露十四

月照芙蓉香含湛湛挹此明珠鬚眉可鑑

靈草十五

著耶芭耶產于何土香光莊嚴法性玄圃

玄芝十六

香水海畔有七金山毓瑞采采服之童顏

方竹杖銘五首

藏虛于實寓圓于方拄天匝地隨君舉揚咄轉身何處尋踪跡驀直歸家夜未央贈葆一兄

直旣中繩方亦中矩烟水百城賓中識主贈如是師
勁節虛心相對何語離却有無誰奪誰與贈積如丈
不存軌則聊示方隅看雲戴月逸塵而趨贈知十丈
毋利汝體毋露汝端捨之慄慄用之蹣跚自題

詩偈

山居百八偈有小引

抱病入山了當大事之不暇而暇作吟哦活計

乎。然俯仰身世，自憫憫。他又似有不容默默者。隨意所到，舉筆直書，積而數之，偶成一百八。蓋實不向吟哦中來。倘得意忘言，亦未必非了當大事之一助也。迺不毀而漫存之。

只此萬山中，悠然意不同。望江迷客路，禮塔懷真風。茅室我晏坐，時復觀筠叢。羸來病後質，安問窮與通。

一

自芒鞚破從教，萬慮慵短衫。堪度夏敝襖，復經冬。

禪起餘長嘯，談時僅短鋒。晨昏伴幽寂，崖上幾聲鐘。
三

山谷陋無窓，惟標離相幢。交吞既非獨，兩照亦非雙。霞色燭短嶺，月影凝長江。爲歎舉棹者，胡爲多釘椿。
四

問予何所事，禪餘讀梵書。寂默固無在，葛藤奚待鋤。俯仰聊自適，賴此狂與疎。香木日已燼，何如長作樗。
五

一病五百日，形神並已枯。縑素偶相值，稱我爲禪癯。

禪癯竟何解佛法從來無倦眠醒便起笑此空頭顱

六

我性耽枯寂愛此山中山珍禽曉破夢孤猿夜伴閒
白雲時出沒流水亦潺湲得失永無慮有門常不關

七

我愛山中行安步不須馬有時訪怪石有時趨樹下
本無取境心何勞更修捨嗤彼世塗中鑽龜復打瓦

八

我愛山中住觀化俯且仰一法不當情萬綠同鏡像

幾言獨露身無端已成兩笑破太虛空巖谷爭酬響

九

我愛山中坐一日兩日永頃雖鵠未巢樹亦枝無影
既不耐誼譁亦不味幽靜形疲便起行枯椿變浮梗

十

我愛山中臥易寐還易醒醒寐惟幻形誰實司肯綮
諦觀五陰身非別亦非並不知何所緣猶然不自肯

十一

我愛山中春雪埋古路塵幽蘭笑巖石遊子行且逡

松色宛如舊鳥聲亦不新避秦嘆未久尚有義皇人

十二

我愛山中夏心閒日逾暇茅屋足清涼何必登臺榭
介爾華欲敷奚物堪酬價一片白雲飛雨似車輪下

十三

我愛山中秋微雲淡碧流桂少香倍烈菊瘦姿迺幽
白粲早已熟寒蟬聲未收飯罷峰頭坐長江天外浮

十四

我愛山中冬密雲覆重重雪舞盡如蝶簷結宛似龍

室內饒焦木門外無行蹤擁被鎮日坐不參五葉宗
十五

我愛山中風暮息朝復有寒時漫相疎熱時仍覺厚
疎厚自隨情此君元不受欲知情性長問取池邊柳

十六

我愛山中花徧處呈佳錦草木雖殊質香色均成品
清賞適相宜何堪供佩祚幽然傲深谷不伴時流飲

十七

我愛山中雪萬峰同一覽潔矣無片塵清哉有餘淡

壓竹每成梁綴松多作齒何須蘇武吞子亦將爲捲十八

我愛山中月寒光照深廣萬里絕雲霞一窻饒冷淡
移來柏影長拂此幽人臉青哉月喻經圓缺皆從漸十九

我愛山中泉內湧非從邊淵淵離煩垢冷泠凌碧天
煮糜信甘美烹茶亦奇鮮誰爲知味者請問光音禪二十

我愛山中石縱橫亂成格苔蘚作衣裳雲霓備冠烏

不點生公頭寧畏提婆擲兀兀伴餘年笑我煙霞癖二十一

我愛山中松行列亦橫縱數尺已似蓋盈拱還如龍
奇根傍危石質癯姿乃丰嚴冬一夜雪偏體白芙蓉容二十二

我愛山中竹交影堪成屋風來奏梵音雨過抽新簇
勁節出長林虛心符短牘雙徑不須開千畝藏幽谷二十三

我愛山中晴日照幽溪明雲霧忽何去松篁乃菁菁

長空鳥迹迴短嶺泉流清舒體一獨嘯深谷頻相贐

二十四

我愛山中雨鳥鵠同歛羽抱膝坐繩牀寂爾無聞覩
倦來舒脚眠倏忽經五鼓捫枕辨方隅手眼知非瞽

二十五

我愛山中雲幻作庭前供星散各爲葩烏合還無縫
乘來身較輕騰去天爲重曠矣任翱翔誰共虛空訟

二十六

我愛山中日冬夏咸和適霜露釋然消幽室能生自

浴溟此先知懸鼓還非隔正午打三更疑殺參玄客

二十七

白雲捲還舒清風拂還止問我山中樂從來只如此
懶向蒲團求亦不鑽故紙若作佛法商千里復萬里

二十八

未知牝與牡安辨黃與驪冬來風颯颯春至草萋萋
法本不相待徒勞似木雞遊子欲問道流木溝前谿

二十九

飲酒每嫌淡食肉祇喜肥嗟此惻隱性長閉嗜欲扉

60 1 2 3 4 5 6 7 8 9

10

11

12

13

14

15

16

17

18

19

20

豈思蔬與水亦已堪療饑瞬息面目異何時復知歸

三十

好花明月下一杯仍一杯酣後長舒脚熟睡聲如雷
恣言人世樂那信身如坏息斷知何去空令親屬哀

三十一

少年競脂粉窈窕思長娥秋波送深媚雲鬢開沉疴
卮酒雅相贈舞罷還醉歌之死矢靡悔悲哉燈畔蛾

三十二

美人衣羅綺纖指彈琵琶音韻清且婉態度雲復霞

仙尚失神足人誰不歎嗟寧知一線斷傀儡歸泥沙

三十三

逐興呼美酒舒懷撫瑤琴豈無暫時樂終爲壞苦侵
迷頭常認影歷劫從他尋何如撒兩手瀟灑出稠林

三十四

人將雞豕烹獄卒將人煮酬償無已時楚毒那堪侶
何不修慈心民胞物吾與蔬水足資身二簋亦可祿
客來餽菜根養親獻葵茹有生皆愛命奚忍充豆俎
君子遠庖厨掩耳盜鈴語

60 1 2 3 4 5 6 7 8 9 10 1 2 3 4 5 6 7 8 9 10

續金編

卷四

十三

三十五

饋肉令人悅揮刀令人恐不從刀上來此肉何由捧食之信可甘思之寧不悚斯事尚心安何須咎作俑

三十六

淵明嗜杯酒不與蓮華盟折腰既弗屑麴蘖胡偏醒欲深天機淺格言羨莊生性學豈多術無如理勝情

三十七

壯士血氣盛國步誇邯鄲殺人不敢睨一語盟肺肝義勇洵絕世仁慈體迺利圖窮露匕首觸鬚千古寒

三十八

草茂忽復萎月滿忽復虧少壯尚難保老大安可怡莫問死何去只今在者誰空華結空果拭目知未知

三十九

紅顏曾未幾倏忽斑兩毛爭趨愛欲談積劫歸塵勞斯世竟何恃苦趣誠無號早悟不生滅咄言王母桃四十

拜將羨椎埋誰知身在鷗生來惟兩脚寧復須三轔營營竟何益終就無常豺試看北邙土多是食瞑骸

60 1 2 3 4 5 6 7 8 9

10

80

1

2

3

4

5

6

7

8

9

四十一

切利一晝夜人間已百齡縱使滿百歲猶然朝菌形
况復多夭折瞬息無安寧胡不一猛省甘爲四大刑
四十二

玉兔甫西逝金烏復東昇少壯日已去衰病時時增
寐者終不覺智者思自懲欲使冰成水無令水結冰
四十三

梧桐一葉落天下同驚秋老少死無算見者胡悠悠
眼前幾許樂貽却千古愁早唱歸家曲莫待捐荒丘

四十四

狐免營其窟烏鵲爭其巢孰知咸在旅生死均浮泡
茫茫苦海闊欲度須繫匏莫使荒郊骨還令梵志敲

四十五

東鄰慶新婦西舍哭亡男哭者不復笑慶者終必惔
悲歡亂衷曲擬北仍復南輸與煙霞客隨緣宿草庵

四十六

世法多崎嶇禁賂還存賄枉道或容身直道每招罪
何如野衲閒薇蕨堪充餕風來翠竹鳴雲去青山在

60 1 2 3 4 5 6 7 8 9

10

80

1

2

3

4

5

6

7

8

9

俯仰獨清寧家風常不改

四十七

賤夫登壘斷巢許棲高岡清濁固霄壤取捨同膏肓
不知三界夢剜肉強作瘡一念悟無性十虛任徜徉
真獨唯兢兢豈達無生忍一翳甫在晴空華斯亂殞
欲令華相滅莫向空中汎

四十八

木氣每成虹地蒸每作菌介爾本無形刹那已有朕
未出有無關空勞此靜坐莽蒼三返人撫腹猶稱果
五十

風來萬壑鳴月出千山皎笑此頑虛空常爲明動擾
不動復是誰豈居風月表離卽旣雙非問君了不了
胡弗畏深坑徒憂打之遙騫直轉欹裘空爭內外紹

五十一

荆璞未應剖卞和徒自泣雷鳴二月春蠕動皆離蟄
屈伸信有時何用勞汲汲築碎太虛空從古原無汁

60 1 2 3 4 5 6 7 8 9

10

80

1

2

3

4

5

6

7

8

9

續金經

卷四

十一

五十二

畫餅不充饑 美食不中飽 欲縛樹頭風 勸取龜毛絞
弄假豈成真賣拙 翻爲巧俱盧 日落山瞻部 雞鳴卯

五十三

聖訓恒諱諱 令觀五盛蘊陽談 與空華無我誰欣忿
生死靡暫停 幻質同朝槿 了知呼吸關至道 斯云近

五十四

禦寒不縕績 糊口不耕田 佛制固如此 誰思共息肩
神王翻貝葉 形疲且穩眠 何須學枯木 失此無心禪

五十五

有嘲不用解 有山不用買 泉流月影長 霧壓空形矮
起臥任所適 語默隨瀟灑 拐杖登巖阿 野鹿馴無駭

五十六

今夏稱酷暑 此地偏清涼 金風初到嶺 木葉早已黃
霜後菜味逸 饑來食易良 飯罷更何事 加趺送夕陽

五十七

自昔違故國 客路良迢迢 回首信非遠 縱步終難翹
賴有舊時友 舉手頻相招 同行不肯返 如何獨乘船

60 1 2 3 4 5 6 7 8 9

10

80

1

2

3

4

5

6

7

8

9

五十八

我去千里外朋來萬里中趨避各異旨臭味胡相同
取捨信有極詣極思真風笑指南詢客悠悠路未終

五十九

非我漫傷今嗟時太不古律法如亂絲禪宗更莽鹵
庶幾義學家猶然水添乳悠悠淨土門事理分捨取
各披祖父甲翻倣負嵎虎哀哉復哀哉坐致魔軍侮

六十

枝葉秋已摧貞實冬無敗所以真僞嗣終莫逃爐鞴

欲使稻梁肥殷勤先去稗折攝似分途同歸調伏戒

六十一

人侮非自侮自侮非侮人不受禮歸主妙喻真且親

修羅慢幢折帝釋勝幡新忍爲力中最勝敵寧揚塵

六十二

調心如大地寵辱何關意美玉良自珍角石翻成猝
遐哉睡虎機千古稱難企誰知歌利王鹿苑先蒙記

六十三

言居佛祖先行落凡愚後漫抱法門憂自疾甘無救

60 1 2 3 4 5 6 7 8 9

10

80

1

2

3

4

5

6

7

8

9

續錄編

卷四

十八

恥躬愧儒宗歸農慚禦冠莫誇日正長瞬息聞更漏

六十四

揠苗徒自損溝澗盈還涸九仞不及泉枉向高原鑿
慎終亦謀始所厚那堪薄醍醐願共餐善巧先鑽酪

六十五

三十未始壯四十今已老徒爾費芒屨依然不問道
既懲從井仁豈學手援嫂見彈求鴟矣嗟哉計太早

六十六

壁影本非魑孩童疑作鬼白日忽升天見徹無頭尾

秋深饒月華春到多芳卉根境未離籜受用能有幾。

六十七

四衢遊坦坦白牛步緩緩已悟勝蓮時方知忍土短
成壞等浮漚依住均累卵啾啾器內蚊誰信斯非誕

六十八

牛犢不畏虎傷鳥怖虛弓安畏雖異局對境皆懵懵
何如見諦士了了知無忡遊戲逆順界寧戶勝敵功

六十九

避世不擇地避地不擇人烏江已非漢桃源亦屬秦

所以明哲士沒踪莫藏身欲知剝海性從來惟一塵
七十

鶻噪固無憂鴉鳴亦報喜聲性本非殊聞機寧異耳
一耳聽兩音兩亡一便止無明從此無始覺從此始
七十一

咸臨吉乃利倚伏洵多義甫唱拔茅歌旋生朋黨專
世事固應然調心尤不易難提起四禪魔女偏相魅
七十二

蹇不利東北解亦利西南安身迺崇德幢幢奚所堪

鴻飛麗天表袁躍歸深潭思慮泯無朕白日眠方醉
七十三

居德忌成夬育德貴如蒙大道曠無際何以耳似充
出關驚枕夢入場嗤老翁熟讀霍光傳方知養正功
七十四

亢龍成碩果无悔須歸潛形氣尚應爾况復心法嚴
洗心貴藏密豈兆涼與炎滴油莫墮地稟稟刃方銛

七十五

逐妾又尋真揚灰復鼓塵未悟賓中主安知主裏賓
絕余篇

60 1 2 3 4 5 6 7 8 9 10 1 2 3 4 5 6 7 8 9 10

美食飽所棄糟糠饑所珍滔滔天下是沮溺同迷津

七十六

希顏復學孔未出三界籠步老復趨莊依然舊漆桶
太極未生形自心早妄動石火電光機何勞誇一統
七十七

旣慚德不修又愧學不講德學本同條誰能作兩項
紫陽與象山各喫三十棒識取宣尼宗方來證溝港

七十八

童冠沂水遊三子異其撰一哂一喟然黑豆換却眼

央掘發誠言胎難安然產讀至不動章大慧顏當報

七十九

前際不可窮後際不可極現前介爾心邊際渺難測
明明法界宗妙觀胡墨墨奮起金剛拳打碎無生國
八十

欲雪先集霰欲雷先耀電如何欲成佛福慧毫無片
流小石能穿鑽息火誰現須教熟處生擐甲同鏖戰

八十一

星火燎荒原一指蔽山嶽易訓誠履霜宣尼貴先覺

未窮學地流慎勿誇無學泥在水非純稍動還成濁

八十二

獨水殊可清暗室燈能破惟有靛池公獅吼終驚臥
跨下亦登壇大將非從貨悅草披虎皮徒令千古唾

八十三

狡狐能惑虎木鷄難怖禽可欺不可罔神全乃莫侵
面南看北斗端的誰知音曾經勝熟談徹體涼且惜

八十四

崑崙非宿海宿海非阿耨滔滔萬里流一滴源誰透

漫傳天上来錯認銀河胄賴此投海機從前皆免究

八十五

六塵本太平六根亦非燒問取六識身蹤跡尤杳杳
誰爲結使源細覓終難了試看瓶內空傾出知多少

八十六

色色彰苦空聲聲演無我拈來法界鑰開盡塵沙鎖
規角便知牛望煙豈惑火若要船頭直端却船梢舵

八十七

須彌怪石供海水塗足油陶輪擲千界刹網收雙眸

60 1 2 3 4 5 6 7 8 9 10

80

9

變身四萬二入聖終未優擬作神通會新添頭上頭
八十八

鯤潛知海闊鵬徙知天高十虛信寥廓何如徧吉毛
縱步歷塵劫徒令童子勞迷此一隙理今古同滔滔
八十九

金屑不著眼毒器不貯漿王饌未敢食華屋徒窺牆
垢盡明自現胡勞羨色莊春風一夜起蘭蕙徧溪香
九十一

芒鞶棄屋後鉢袋掛茅菴非敢濫無學坐訪同行叅

石蜜味中最食乃知其甘見月艮賴指寧復撈深潭。

九十二

力疾復談經非甘背夙盟應憐慧命斷誰顧色身吟
字字杵嬰血言言佛祖型寄規龍象衆莫作等閒聽

九十三

語不競朝華病應消夙業獨愧衰朽身難企尊者脇
法無心外傳道自威音劫明明梵網燈未審誰先接

直指西來意楞伽心可安語言同解脫內守偏躡跚

60 1 2 3 4 5 6 7 8 9

10

80

1

2

3

4

5

6

7

8

9

休戀聲前句還思步外竿不嘗天下醋那信一般酸
九十四

霧行不覺潤日照咸知暄獨憐之楚客往往北其轍
珠固在濁水蓮豈出高原爲問南詢者詎曰甘勞煩
九十五

學士畏枯寂禪德怖繁文繁文信無益枯寂亦添瘞
蛇繩見方熾取捨徒紛紜捉鼻謾高喚燈照知非積
九十六

未明心與性讀誦徒喃喃甫欲思上達暗證還自緘

不解順流棹豈知逆風帆呷盡四海水到頭滋味鹹

九十七

競爲格外鋒圓念昔時典因護乃至吠堪嗟梵志大
財慳尚可回法執誰能遣五百野狐身覆轍偏爭踐

九十八

佛語卽佛心佛心非佛語離此卽非關究竟誰爲汝
一句了然超萬劫合頭杵若要舌本甜勤取黃連茹

九十九

心肝掛樹杪此理從來少離教覓單傳寢鼈何時了

60 1 2 3 4 5 6 7 8 9 10

80

9

綱領

卷四

三十四

妙指發妙音非內亦非表側耳不會心依然打之遠

一百

觀箭毒逾蟻問橋路逾遲路遲日易暮毒蟻邢堪醫
有藥不早服有足不早馳茫茫生滅海誰與定歸期

百一

毒蛇勿捉尾甘露勿添水添水飲成病捉尾蟄人死
執項善調御功歸豢龍氏悟時轉法華良哉惠能旨

百二

聽法不觀心死至成狼狽觀心不聽法執刀還自害

未知說默源同條却異會鼻孔向下垂空讚威音外
百三

長語悟非多雪填井便無要言迷不少小毒還生瘻
何勞妄欣厭共把真宗誣早修開演智莫畫舊葫蘆

百四

執藥每成病借病翻成藥通塞靡定踪觸境須深度
知人勿昭昭自照無莫莫一言燭根元千山勝行脚

百五

聚螢不爇草聚雪不成山鑽紙信無益枯坐終癡頑

60 1 2 3 4 5 6 7 8 9

10

80

1

2

3

4

5

6

7

8

9

未歷羊腸險安知行路難千里始初歩休商最後關

百六

洪鐘叩乃鳴美玉終須琢不覓惡鉗錘豈破無明殼
護茲煩惱情忍使靈光剝幽幽長夜寒熟睡誰能覺

百七

烏鵲忽成馬展轉無非錯佛滅曾幾時哀哉水潦鶴
矧茲最後年何地尋略苟斯文賴未亡共聽封人鐸

百八

日輪挽作鏡海水挹作盆照我忠義膽浴我法臣魂

九死心不悔塵劫願猶存爲檄虛空界何人共此輪

幻寓華嚴菴四偈

笑破無生夢拋開有識身隨緣聊寄足何事可關神

瓔珞偏宜病鶴衣不厭貧灌園慚計拙莫復更思專

九子峰偏靜非干車馬喧有菴藏竹徑無客到松垣
地是金沙布天從螺髻援加趺消永晝欲辯已忘言

未具搏風翼欣同維鵠巢粃糠能作飯野菜亦成肴

泉飲方知冷情枯始可交半生慚孟浪今復愛吾犖

千里歸盟主寧辭風雨侵緬懷恒尚古扼腕每悲今

60 1 2 3 4 5 6 7 8 9

10

80

1

2

3

4

5

6

7

8

9

野獸夜警寐山禽曉奏音苦空須早悟無負最初心

遣病歌

九華峰頭雲霧濃三月四月如隆冬敝袍厚擁供高
臥尚嫌煖性來無從九華山中泉味逸百滚千沸甘
同蜜拾取松毬鎮日煨權作參苓療我疾堪嗟我疾
療偏難阿難隔日我三日寒殺閣梨熱亦然已信浮
生危脆質豈從旦暮戀空華悲我知門未詣室是以
勤將神咒持擬開同體妙三慈我病愈時生界愈刹
那非速劫非遲箇中消息誰當辨痛癢相關漫自欺

夢徹公有感爲持咒偈

十載彌天網心心獲異禽螟偏誤入五夏漫投誠
一竇功猶缺他緣早受侵神交雖不隔托足已殊林
百里半九十悠悠關我襟支頤頻到夢寤想倍憂深
龜勉販明咒終期聽好音力追先哲道莫陷近時燭

三十八歲生日偈

有序
五月初三日

予自分三十八歲必死扶病勉強入山不欲留
此骨於人間世也山中與我同生者三人皆於
春夏之交逝矣予猶延殘喘得至今日實三寶

60 1 2 3 4 5 6 7 8 9

10

80

1

2

3

4

5

6

7

8

9

及神咒力耳爰成一偈以感佛恩

誤受五行質恒爲四大侵庚從丙火鑠計使月光陰
揜作山中骨寧存塵世心獨露神咒力偏渡業河深
已悟無常浪重聆實相音菩提須永發正法誓長今
豈視魔軍擾甘令佛道沈

有所慰

君不見帝釋五衰相已現甫唱三皈貌更殊又不見
趙州苦行山中足膝蛇變作龍戲珠從來逆境多成
就歎息幾人能自孚動心忍性誠實語自暴自棄非

良圖夏草茸茸霜所敗松柏亭亭冬不殊寒威適足
堅我骨冰雪還堪養我株老虬千載稱神樹豈向春
風競賞娛大任舍予誰克荷精金須煉終非誣試看
山前行路者崎嶇歷盡是通衢

病餘寫懷四偈

一條拄杖兩芒屨海闊天空舒我骸愛見慈悲終作
疾婆和學侶謾爲儕悅心有法聊成賞糊口無糧却
是齋好惡雲山隨意歷莫商何地把身埋
昔日曾吟五子歌典刑依舊憶熙河宗庭獨力除荒

60 1 2 3 4 5 6 7 8 9

10

80

1

2

3

4

5

6

7

8

9

草敎律誰能共執柯雨露重時恩念少鉗錘辣處怨
情多堪嗟大願無方便還向金鉄自切磋
勝心雖發足凡情十載依稀舊路行疵露任從人世
撥心虛惟念斷金盟莊生有斧嫌無質旭子徒存望
孰平笑殺巴人猶少和引商刻羽欲誰賡

大小由來出路岐無端埋沒好男兒花香暗被狂風
洩果嫩偏遭淫雨漓收拾敗棋輸已半搜羅剩騎氣
方贏三年嘗膽嗤非久須學華嚴塵劫思

重閱大藏偈

我年三十歲閱藏求殊琛身心並安適志欲老叢林
無端被名累善友牽我襟雖受切磋益酬酢時相臨
實德愧無寸虛膺人世欽夙障得其便惡疾斯來侵
悠悠且復暮遷延乃至今賴此病良藥入山恐不深
棲止寧擇木怖曲同傷禽乘時理舊業隨緣且自箴
已識浮生夢何勞謀金鬻爲哀道者恒復長呻吟
法藥須療病豈曰甘爲蟬鍊酥能作酒當令猛光欹
魔外固多巧誰堪七縱擒勉旃莫辭誕法雨將咸淋

有感偶成

他人之惡不可助。助惡猶如投火聚他人善事不可阻。阻善猶如違害鬼。遏惡揚善順天休罪滅福長。不須求以善資。善喻積糞。徹底臭穢終難近糞穢。猶令田稻肥惡業徒招地獄悲。

喜病口占

病作丸湯經作醫苦空無我適相宜一倫生死無生減痛殺閻梨知未知

題五釵松

昔時五釵化作龍。今時五釵還成叢。昔時大士孤峯坐。今時大士盈山中。五釵本自大士種。撫茲道樹知慈風歲寒不改青山色。雪綴依稀帝釋宮。帝釋宮中曾現瑞。百千身相同。名字願力塵沙未足奇。誰信泥犁無礙事。法身輪轉水爲冰。性惡昭然性善義迷悟。關頭一念融刀山劍樹隨遊戲。笑指庭前柏樹參。那知此樹西來意。

贈見心開士偈

有小引

見心開士爲九華尊宿喜營福事非一日矣

60 1 2 3 4 5 6 7 8 9

10

1

2

3

4

5

6

7

8

9

神廟時所頒大藏久未供奉開士復捐衣鉢之餘爲櫚供之予因閱藏以偈贊曰

諸佛慧命常住法身云何不滅三藏是珍因指見月
月見指親文字觀照實相同真一展一誦爲梁爲津
維我開士信此妙因如法供養有叙有倫護彼侵蝕
卷帙常新便彼簡閱次第攸陳悟性永發功由爾遵
繙林之導法王之臣何以報德劫外長春

丁丑季冬禮千佛於九華藏樓偈贈諸友

謾云苦瓠換甜瓜應信慈尊並我家念性不勞參木

月低頭已駕白牛車

介爾靈明絕古今摩尼豈被汨流侵珠澄濁水清光
露映徹晴空萬像森

堆山積嶽盡塵埃力把慈風一夕摧吹散鐵圍無暗
地何須拭目問明來

昔年窠臼一時掀臘盡春回日已暄欲信崑崙泉脈
動但看河凍不勝輒

歲月如流不可期強將識性試旋思三千鼻孔終無
異一樣鬚眉那自疑

60 1 2 3 4 5 6 7 8 9

10

80

1

2

3

4

5

6

7

8

9

靈犀一點性元通觸境逢渠道自融慕地舉時聲歷歷相看同在寶樓中

芥翳非關眼性明空華飄舞孰朴榮道場當處無成毀記取當年常不輕

一體橫分想與情冷然性計卽無生功成五悔非畱惑莫替樓頭最後盟

贈頂瞿師掩關念佛

一句彌陀聲歷歷自他共離不可覓是心作佛是心是熾然感應真空寂暮直歸來莫問津無明睡裏轟

霧靈醒來捫枕笑呵呵夢墮大河誰實溺夢時非墮
醒非超一任凱風同奏勸髻珠解處紹功成內外空
爭庶與嫡權實由來不二門白牛背上橫吹笛一曲
無生明月寒從來不用降魔檄

因拄杖折聯成舊句

久將北斗面南看回首家鄉月影寒拄杖折時手眼
瞽芒鞋破處足心酸不勞藏跡鍼鋒裏偏解拋毬急
水灘一嘯忽傳林谷響石人撫掌白雲端
夢感正法衰替痛哭而醒述偈寫懷二首

60 1 2 3 4 5 6 7 8 9

10

80

1

2

3

4

5

6

7

8

9

幾番視聽悚狼威脂欲消時肉漸肥自許肝腸終莫
改那堪聲氣合仍違魔軍邪幟三洲徧孽子孤忠一
線微夢斷金河情未盡醒來猶自淚沾衣
休言三界盡生盲珠繫貧衣性自明肯放眼前閒活
計便堪劫外獨稱英不龜手藥猶分用無上尸羅寧
隔程泣慟莫嫌頻入寐會須踐我最初盟

道過齊雲問訊貞武

烟霞賸癖此中分遙望名巒勢欲夢擬向玉屏占瑞
氣還從金鼎挹香芬千尋曲澗鳴流水萬朵青山綴

白雲子亦佛門爲外護何妨破格友真君

四十初度寫懷

物論悠悠理本齊年來漸覺脫筌第拳開非實掌元
在翳去惟空眼不迷流水有心終滙海落花無語亦
成谿刹那生處生何性笑把威音劫外提

雨窓選佛分得東文二韻

何須翹首福城東十界圓歸一席中衆壑爭鳴同就
海簷聲滴斷熟梅風

擬將遊戲觀迦文却喜空山布法雲輪相轉時知性

60 1 2 3 4 5 6 7 8 9

10

80

1

2

3

4

5

6

7

8

9

起催呼早已震魔軍

喜雨歌

初夏久陽暘人情爭畏旱芒種雨如傾溝澗咸充滿
一霪十晝夜溪流抑何憚我坐陽山第一峰禪衣擁
膝偏稱暖倦來無事且經行選佛場中欣有伴焚香
煮茗樂悠悠雨點風聲片語收風吹不入雨不濕堪
笑從來學未優三身四土都霉却翠竹青松雲外浮
君不見隨他一語千山走今日重添頭上頭

贈葆一兄

新安諸峰多淡雅陽山獨自稱秀拔悠然小閣築松
間倚欄坐耽襟期豁城市紛紛聲不侵萬山點綴浮
雲闊鳥語蛙談了義誼磬魚梵唄閒生活我來結夏
信奇緣坐向塵中剖大千葆公夙志亦非小衣珠欲
向迷前曉梵世絲垂擬就鍼風師珍重莫相侵佇看
投契無踪跡繡出鴛鴦絕古今絕古今微塵國裏足
知音目前雞肋何須戀携手同歸解脫林

寄懷未能

文字離微影不留玄機欲唱孰相酬因憊屢中神猶

60 1 2 3 4 5 6 7 8 9

10

1

2

3

4

5

6

7

8

9

隔都翻憶如愚益可收九子峰頭標月指千如境裏辨
金鑰靈犀通處知無朕莫負持明助遠猷

新秋懷如是師

林低鳥迹迴石密竹影癯白雲填萬壑殘月掛斜株
嗟此不成寐我友天一隅敦好信非久時復懷嘻吁
警衆友

翹首菩提路悠悠幾陌阡應憐小證後重憶大通前
月指謝綠影鏡像明媸妍自慚說法鳥誠爾莫生天
題扇寄懷野愚索印章

天都列千嶂遠望積平郊松陰拂危石幽然築小茅
無事此靜坐日影移林梢慚予天外友携杖徒神交
翹望別峰外矯矯白鶴巢短吟聊寄興新句未堪敲
借靈思妙腕解此半生嘲

贈華林開士

九旬結夏陽山峰松陰竹翠隨俯仰坐談喜有二三
英欵目還勤九華想九華山頭有老僧心慈體厚神
爽朗言笑春風徧席生靈根堪作蓮盟長海陽三百
路悠悠日出扶桑一影收識浪息時心水湛願風鼓

60 1 2 3 4 5 6 7 8 9

10

80

1

2

3

4

5

6

7

8

9

處行雲稠悲緣有種惟應拓惑業無根任意抽片語
神交聊寄贈努力追蹤脅比丘

別玄覽

雨歇松林濕未收寒蟬怯露聲如抽九旬同住忽云
別孤懷不語偏悠悠丈夫慷慨重一諾片言矢志須
千秋白雲出沒竟何性碧空青皎光沈浮智士從大
不從小愚夫近慮無遠憂皮囊愛惜終捐棄虛名赫
奕奚能留何如曠覽寰區表高登闊步遵玄猷簷風
吹醒循階夢彈指先參慈氏樓君不見菁菁夏草今

如許翠柏霜殘葉不柔

附對聯

地藏塔前對聯

帶果行因一顆慧珠光爍爍照泥沙即是究竟寂光
秘大現小六環行錫響琳瑯喚昏蒙當體真常大覺
化城大殿對聯

石壁雲窩非世界非微塵托幻表真由大願
心地性藏卽化城卽寶所開權顯實在當人

法堂對聯

60 1 2 3 4 5 6 7 8 9

10

1 2 3 4 5 6 7 8 9

80

1 2 3 4 5 6 7 8 9

總錄

卷四

古佛垂慈六度四弘同會極

新羅示迹一花九葉別傳燈

三門對聯

和尚石一音說法

芙蓉峰六時獻花

絕餘編卷四



60 1 2 3 4 5 6 7 8 9 10 1 2 3 4 5 6 7 8 9 80 1 2 3 4 5 6 7 8 9

二

五